


# *I FŪNGULILO KU KIFIGO*

 U lusako ukuya ku kipānga! Ikyēne kyāli panini kisitakugūliligwa kwa une, nīne. Une, mmenye ikilo iki kyāli kilo kya mugonesyo, une akabalilo kosa ngukigana, linga une ndi kifuki kulikosa, ukwīsa ukwingila muno pa mugonesyo. Panongwa yakuti ikyēne kyo. . . Une ngwinogona ukuti bōsa a Bakristi bikufīmbilisigwa ukugūlila mu kulya u mugonesyo, panongwa yakuti Yeso āyobīle, “Linga ugwe kulya ikyēne mma, ugwe ukuya ni kiyabo na Une.” Polelo, ikyene kyo. . . akabalilo kosa lusako ulukulumba uku—ukwisa mu kipanga. Polelo, ikilo iki, Nkundwe Neville āyobīle umwēne āli itōlo panini ālile, kangi—kangi āliganīle linga une nguyobaga ku kilundilo kyītu. Une nālimbūlile umwēne une nguyaga gwākūsāngalūka ukubōmba lūlo. Une ngulonda ukufumusya kāngi ukuti linga. . .

<sup>2</sup> Kilabo nkilo lo lukomano lwa banyāmbāla, abakyungahela, kilabo nkilo, kangi abakyulusi apa aba kipanga, pa lwābo ulwābwila lukomano lwa Kilēmbēlo nkilo kangi ulwābo. . . ukuya ni līnogono ukutēndēka nu njēngesi. Une ngusakisya umwe mwēsa mukupilikisya ukuti ifyītu—ifyītu—ifyītu ifikalatasi fyābūkile ukukīnda, kangi uswe tukuyaga bakubagila ukuyēnga i kipānga. Kangi popāpo ikyēne kikubūka ukukīnda, kangi lumo kisakwānda undungu ugu. Ikipānga kikwānda mmwanya undungu ugu, mūmo une mmanyīle. Kangi abene balinkutukana uswe pa kyene, apa mu Jeffersonville. Lōli uswe twābūkile ku Indianapolis, i kīsu, kangi abene balinkutupapo uswe ulwītikisyo, popāpo uswe tukuyaga pakuyēnga ikyēne. Kangi polelo ikyēne kikwānda, lumo, undungu ugu. Ikyēne kisakumanyīgwa ukufuma ku lukomano kilabo nkilo. Kangi polelo ukufuma pa lukomano kilabo nkilo, linga abene batikwānda undungu ugu, linga ikindukimo kikuboneka, u njēngēsī akabagila ukwānda undungu ugu, umwēne ikuyaga pakwānda undūngu unkōnge.

<sup>3</sup> Kangi ku bumalikisyo bwa ndungu ubu bukwīsa, Mpyāgīlo nkilo, pa Ndungu ndubunju kangi pa Ndungu nkilo, ugwa ndungu gwakilābo, ugu unkōnge ugu gukwīsa u Mpyāgīlo kangi pa Ndungu, u Ntwa itikisyēge, une ngulōnda ukuya na u—u—u lukomano lwapatatu, kāngi, mūmo uswe twābōmbīle imilungu minandi igi gikīndīle. Kangi polelo ukufuma pāpo uswe. . . Ikyo kisakuyaga Mpyagīlo nkilo, kangi polelo u lubunju lwa Pandungu, kangi polelo ikilo kya Pandungu. Ugu unkōnge, ikyo kisakuyaga ilya-kalongo-na-matatu kangi ilya-kalongo-na-mana ilya mwēsī ugu.

<sup>4</sup> Kangi polelo bamo mwa bakundwe na une tukusōkapo ukufuma pa kabalilo kala, kula ku Colorado, pa bwendelo

bwa kufwima, polelo ukugomokela. Linga i kitembe, akabalilo kâko icyene kimalîke, linga icyene kikuyaga bwîgâne bwa Ntwa, Une ngulônda ukwêga, lumu, undungu gôsa bo une ngâli ukusôkâpo kângi mu ngomano, nukuya ni *Fungilo Ihano-na-ibili* isya Busetuli. Itolo bo. . . Bo uswe twâli *I Ngulilo Ihano-na-ibili sya Kipanga*, lilino *I Fungilo Sihano-na-sibili* ukukôngésya Ikya.

<sup>5</sup> Kangi lumu mu kifuki imilungu mibili pamo mitatu, panongwa yakuti une ngwinogona abene bikwiyobela ukuti abene, na banyambala aba abene bikubukaga nkyeni pa kyene, abêne babagîle, uswe tubagîle ukuyenga i kipanga nukuya nakyo icyêne mmasiku kalongo, pamo kalongo-na-mahano, ikindukimo bo ikyo. Polelo uswe tukuyaga ni fwâsi yakutûgasya apa kuli kifuki kabili ka bându uswe tuli nabo, pamo katatu kôsa, lumu abându bîngipo. Kangi iyo yo njila une nâgûlilâga mpaka akabalilo kala.

<sup>6</sup> Panongwa yakuti, u Mpyâgîlo na Pandungu ugu gwâkîndâga, icyêne kyâli kwîkolânia, umwe mumenye. A bându bâlîmîle panja apa pa sala yâbubili pa mûsi, ukwîsusya i kitêmbè lôsa, bo kikâli i kipânga nu kwîgula lôsa. U lubûnju ulukônge, pa sala ya buhano, u nâsi ikwitûgâla ikifigo ikikônge kwa une, ikwîsa ukufuma kumwanya kula, alinkuti, “Balipo abandu itolo bapangenie mosa ukusyungutila i kipanga pa sala ya buhano ndubunju.” Popâpo, kangi polelo a bându, akabalilo kâko abêne bikwîngîla nkati, bukayapo u buyo nabumo, kangi abêne bikusulumanisigwa kangi abêne bikusôkâpo. Kangi—kangi polelo bala aba bimîle, kangi balundikîgwe kangi abene biswîle mu mikolofwa, abêne bikwîpîlika môsa bafinyikisigwe lôsa, na filifyôsa. Kangi une nguketa abakikulu bimile pala, bikusôkamafuke, umwe mumenye, bo ulu, kangi amafuke gikubopa ukufuma ku bene. Kangi u nnyâmbâla yumo ukulekela nu kupa icyâke, u nkîkûlu yumo i kikota; kangi polelo umwene isakwîmaga mpaka amalundi gake gali gikubaba, kangi umunduyumo uyungi isakumpa umwene. Umwe mumenye, kangi bo ulu, kangi icyene kyo kipelakisa, kangi bâmâma na bâna banini ababîne na fyosa bo ifyo, ikyo kyo kibibi.

<sup>7</sup> Popâpo, uswe tukugela ukumasya ikyo lilino ukwisila mu kuyênga ikitêmbè ikinywâmupo. Kangi uswe twisakuya nu buyo ubununu kûko abâna, utubalilo tumo. . . kangi bikufubânia, ngati abâna banini bikulila; ena, uswe tukuyaga ni kyûmba kuli ikyo, ukuti a bâmâma babagîle ukwîngîla nkati, pôpe ukukêta u lukomano, nu kuya bafumusigwe mulamula mu kyûmba. Nu kuya ni fyûmba fya sukulu ya Pandungu na filifyôsa itolo figolosigwe pânja mu njila icyêne kibagilile ukuya. Kangi ukuti, linga u Ntwa ikwitikisya, kikwêga ubuyo, ukwisa undungu ugu gukwîsa.

<sup>8</sup> Umwe mwêsa mwâsûngwîle mia mwa mia pa kyêne, popâpo uswe tukolelîle kulakula ku ikyo, muketile. I kipânga kyo

kyapakyēne. Iki i kipanga kikuyoba, ikyo kyo iki. Bakyūngahela pamo nayumo uyungi. . . Abakyūngajela bali itolo, aligwesa gwa bēne, lusalo lumolwēne. U ntīmi yo itolo lusalo lumolwēne. Ikyene kyo kipanga, ukuti ikyene kyo—ikyene yo demokalase gwa kipanga, ubwapakyēne bwa kipanga. I kipanga, mu fyosa, kikuyoba. Ikyo kyo kyosa. Kangi uswe tukiganile ikyo, panongwa yakuti uswe tukaya nabo nabamo babishopu pamo abafyukano pamo abaketela-pamwanya pamo fyosa bo ifyo ukutubūla uswe *iki*, *ikyo*, pamo *ikingi*. Umwene yo Mbepo Mwikemo nkipanga, ikubomba ukuyoba. Une nduganile ulo ululagilo, kangi ikyene kyo kinunu fiyo.

<sup>9</sup> Kangi une nālālūsīsye, “Ngimba umwe mwēsa mwalōndāga ukugūlila mpāka uswe twāli nafyo ifyākufwāna ukusemesya i kitēmbē nu kuyēnga i kipānga ikinywāmu?” Kila kyāli pa kipambo kya bakyūngakyūma, kangi ikyene kikābagile ukumalisigwa na bakyūngakyūma. Kangi polelo abene bālindalusīsye une, ukuya nketi gwa bosa, ukwisa nukunsuma ikipanga. Popāpo une ndinkuyoba, “Lilino uswe tuli ni hela isyakufwāna ukukusya ubunywāmu bwa kipānga nu kutēdekesya ikyēne fyōsa ifyakukindāna, na filifyosa, ukukinda ifi uswe twali nafyo.” Une ndinkuti, “Lilino uswe tubagile ukubomba ikyo papapa itolo, pamo paya i hela syītu mpaka uswe tukukaba isyakufwāna ukubika ikipānga ikifwāne lōsa, kipya, ubuyo bumo ubūngi.”

<sup>10</sup> Kangi uswe tulibōmba u lusalo pa kyēne mu kipānga, kangi ikyēne kyāli lusalo lwatwēsa kuli uku “bika i kipānga itolo kyōsa lululu lilino, kangi ikyene kyo itolo kuyenga i kipanga ikinywāmupo lululu lilino.” Kangi uswe twitugesye palapala na kila.

<sup>11</sup> Kangi i kitapwa apa mu Jeffersonville kilinkutupika uswe, kilinkuti uswe tukābagile ukubōmba ikyēne. Kangi uswe tulinkubuka ukukilania ikyo, kangi tulinkubuka ku Indianapolis nukutwālapo i Kīsu pa kyene. Kangi polelo abene balikutuma i lisyu ukugomokela, ukuti, “kindililaga,” uswe tuli nu bwābūke bwa njila ukuyenga ikyene. Popāpo polelo a kāya kakaya nakyo nakimo ikyākubōmba ni kyēne lilino, ikyēne kyo Kīsu kikufimbilisigwa ukubōmba ikyēne. Popāpo polelo uswe tuli nu bwītikisigwe, kangi u njēgesi ali nu—nu bwītikisyo mu kiboko kyāke lululu lilino, kangi une ngusakikisya abene bītendekisye ukwanda pa kabalilo kalikosa.

<sup>12</sup> Iki kilabo nkilo, linga u—linga u njēgesi ikuyoba ukuti umwene ikulonda ukwanda undungu unkōnge, polelo une itolo ngōmolāga ingomano sya i. . . mpaka uswe tukwingila mu *Fungilo Sihano-na-sibili*. Kangi polelo linga u njēgesi akabagila ukwanda undungu ugu gukwisa, polelo i Ndungu ugu gukukōnga, Mpyagilo na Ndungu, une nisakuya nu lukomano bo ngāli ngasōkāpo.

<sup>13</sup> Kangi polelo une nayaga pakuya nakyo ikyène u Ndungu ugu, kangi polelo ndinkusyāgánia ikilo iki ukuya kilo kya mugonesyo, popāpo une ndinkōmòla ikyène pa Ndungu ugu. Panongwa yakuti, ikilūndilo bo iki, ugwe ukabagile ukwēga u mugonesyo kanunu mma, kangi polelo akabalilo kāko uswe tuli ni kipānga ikinywāmu uswe tubagile.

<sup>14</sup> Lilino, uswe tuli na Pulezidenti uyu ikwīsa. I. . . o, umwe mumenye iki une ngusanusya, ikyène kyāli itolo kyābīkigwe ku kikolo kya Hickerson pakaya patali mma. Kangi u kalumbu gwītu uyu yo nkuba-piano, linga umwēne isakwīsa nukutupa uswe akasāmo kanini pa piano, aka “Batwala Abene Nkati,” linga ugwe kulonda, pamo akimbo akanini kamo aka luko lula. Uyu u nnyāmbāla unnunu unnini mu kikolo kya Hickerson, uyu alōndesigwe ku kabalilo katali fiyo, yo afikile. U mwīnitu unnunu unnini fiyo, kangi naloli yo libwe-lipala ku baHickerson. Kangi abēne bo bōsa mabwe-mapala kwa uswe, uswe tubaganile abēne kangi abēne bo naloliloli bītu nkundwe na kalumbu. Uswe tukupālisya ukuya nu nīni uyu apāpigwe mu kikolo iki, iki kyo lōsa kyāndwile i kikolo. Kangi linga abēne, tāta na māma bisakutwāla akīnitu akanini aka lilino kuli ulusayililo. Lilino, i Lisimbo likuyoba, “Abēne bātwele ku Mwēne a bāna, abanīni, ukuti Umwene abagile ukubika ikiboko Kyake pa bene nukubasaya abene.”

<sup>15</sup> Lilino, balipo abāndu nkīsu aba bikwitika mu iki abēne bikukōléla “lōsyo lwa bāna.” Kangi, ikyo kyo, abēne bikwēga abīnitu abanini aba kangi batikubōsya abēne napanandi, panongwa yakuti, abēne itolo bikunyāfila a mīsi pa bēne. Lilino, uswe tutikwāga ikyo kulikōsa mu i Bāngèli, kūko abēne nasiku bānyāfile yu gwēsa, abakusi, na bōpe abāna.

<sup>16</sup> Kangi popāpo u lōsyo lo kulāta kūko i mbōmbo yankati ya ipyāna yibōmbigwe. Kangi abāna abanini bakaya nu bumanyi nabumo ubwa butulwanongwa. Polelo, akabalilo kako Yeso āfwile pa kipingika, Umwene āfwile ukwega ukusōsyāpo u butulwanongwa bwa kisu. Kangi akabalilo kāko u bōnda ikwīsa ukuya mūndu, kangi apāpigwe nkīsu iki, abēne bakaya nabo nabumo u butulwanongwa, bwa pabēne, polelo abēne bakaya nabo nabumo ubupīnduko ukubōmbigwa. Lōli, akabalilo kāko ikyo, i Lilopa lya Yeso Kristi likusōsyāpo u butulwanongwa bula. Ena, u mwāna nkāpigwe mu mbibi, abūmbigwe mbutulanongwa, ikwisa nkīsu iki ukuyoba ubusyobi, kangi abene bo batulwanongwa ukwisila mu kipeligwa, loli i Lilopa lya Yeso Kristi likuhombela kuli ikyo. Lōli akabalilo kāko u mwāna ikwisa ku ngulilo ya kwīlōnga, kangi ikumanya iki kyo kitalusye kangi kisobi, polelo akēne kakufimbilisigwa ukupinduka panongwa ya iki akēne kabōmbīle. Ubutulwanongwa bwake lilino bo butulwanongwa itolo bo akēne kapāpigwe mu butulwanongwa, ubwēne bo butulwanongwa bwa mūndu, ubutulwanongwa lilino bo

butulwanongwa ubu Adam na Eva bābōmbīle; kangi bula bwāli bōmoligwe na Kyala, ukwisila mu Lilopa lya Yeso Kristi. Lilino u mwāna akaya ni mbībi ukupinduka ukufumako mpaka umwene ikōnānga, polelo umwene ikufimbilisigwa ukupinduka. Muketile? Kangi akabalilo kāko umwēne ikupīndūka, polelo ko kabalilo ka kōsīgwa, kangi polelo umwēne ōsigwe ukwisila mu kuyubika.

<sup>17</sup> Mpaka akabalilo kala, uswe tukukōnga indagilo sya i Bāngéli, ili, “Abēne bātwele kwa Yeso bāna banini, ukuti Umwene abagile ukubika amaboko Gake pa bene nukubasaya abene.” Umpapi unnunu uyu ikilo iki ikuntwala umwāna unnini uyu ku ntimi na une, kuli ulwīpagulilīgwe. Kangi abēne bikwīpilika ukuti ukubika akēne mu maboko agakwīmilila ga Kristi, abēne bikubika akēne mmaboko ga Kristi. Polelo, nu lwītiko, uswe tukummwēga u mwāna kwa Kyala, ukupa ulupālisyo panongwa ya kutwala akēne apa, nukunsuma Kyala ukusaya akene, iki uswe tukukikōlēla “ulupayililo lwa mwānike.”

<sup>18</sup> Lilino, umwe mumenye mūmo une nguyaga isyakufwāna na bāna bāngu bēne. Une ndinagwe undindwana unnini mu Lwimiko ikilo iki, kangi umwene āpayilīgwe kwa Ntwa, apa ku kigemo. Une ndinagwe undumiana unnini nu ndindwana itugele kunyuma kula, ikilo iki, aba bakosigwamo siku mpaka na lino. Yimo, kalongo na yimo, une nayobaga ku mwene ukufwana ni kyēne umwisyugu, Sarah, panongwa ya losyo. Kangi Yosefu yo mwene fihano-na-fibili, polelo umwene yo nnini fiyo kuli ikyene mpaka na lino, mpaka . . .Linga umwene ikunyonywa ikyene, nukuyoba Kyala ābikaga ikyene pa ndumbula yake, une āngāli ngubombaga ikyene akabalilo kala. Loli, ukuya bānike, une itolo ngubapayilila abēne kwa Ntwa, ’nongwa yakuti ikyo kyo kimanyisyo Kyammasimbo kya ikyēne.

<sup>19</sup> Nkundwe Neville, linga ugwe kusōkaga panja na une lilino ku ndumiana unnunu uyu. Une nātīlaga . . .Ngimba yula yo Hollin? Hollin? Ena, Hollin, Junior. Stephen Hollin. Ena, ikyo kyo kinunu. O, une ninogonaga umwene āgonaga. Ikyo kyo kila kipeligwa kwa baHickerson, kilikyōsa kikubōmbigwa. Une nālīmbwene umwene i lisiku limo, une ndinkuti “u Pulezidenti,” na fyosa bo ifyo. Kangi, ena, ikyo kyāli kinini fiyo kuli umwēne, muketile, ukuyoba isya umwēne ukuya “Pulezidenti.” Ngimba ugwe mwabomba ndaga? Ena, une mmenye ako kabagile ukuya bukabi bumo kwa māma aligwēsa gwabunyakyala. Ngimba umwe mukabagila ukwīnogona bo ulo? Kanyafu fiyo. Kangi lilino, Nkundwe Hickerson na Kalumbu Hickerson, ukuya mbōmbi gwa Kristi, ukuya ntīmi gwīnu, une ngummwēga u bōnda uyu, nu lwītiko, ku maboko ga Yeso Kristi, mwa Yūyo umwe mwīganīle ukukibika akēne mmaboko Gāke.

<sup>20</sup> Unko uswe twinamisye imitu gyitu bo u ntimi na une tukwima apa na maboko gitu pa mwanike.

<sup>21</sup> Taata gwiitu Gwakumwanya, mwi Baangeli abeene baatweele kwa Ugwe abaana abanini, ukuti Ugwe gwabagile ukubika amaboko Gāko pa bēne nukubasaya abēne. Kangi naloliloli, Ntwa, abēne bāsayigwe. Kangi lilino ukukōngésya ikyākwegeléla Kyāko, ifindu ifi Ugwe gwābōmbīle, uswe tugelile kifuki, Ntwa, ukubala i Bangeli nukukonga ikyakwegelela itolo mumo Ugwe gwābombile. Kangi tāta na māma uyu, Nkundwe na Kalumbu Hickerson, abafūndigwa bītu abaganigwa apa mu kitēme, bikutwāla kwa uswe akanīni panandi aka akabuhofu aka Ugwe ubīkīle mu lupākīsyo lwābo. Akēne kafumile kwa Ugwe, Ntwa. Ugwe gwāpēle abēne u mwanike uyu. Kangi lilino abēne bikunyonywa ukupa ubūmi bwāke kwa Ugwe, ukuya bubōmbelo kwa Ugwe. Une ngusuma ukuti Ugwe sayaga umwānike uyu, ukuti Ugwe kwisakupaga akene u bumi ubutali. Akēne kaliyaga kūmi, linga fyakubōmbigwa, ukukēta u Kwisa kwa Ntwa. Une ngusuma ukuti Ugwe kusayaga akene kulikosa akene kaliko. Akēne kalikusigwāga mu kāya ka Kikristi, mūmo akēne kapāpigwe mu kamo. Kangi akēne kali kīndililāga mu nyūmba iyi. U tāta na māma bāli yaga būmi ukukēta u mwāna nkigemo, linga fyākubagila, ikulūmbilila i Nongwainunu. Abēne kinunupo bakakētege akēne injila yila, Tāta, ukukīnda pa—pa kikota ku White House, pamo palipōsa, panongwa yakuti abēne bo bāmbombi Bāko, kangi bikunyonywa u būmi bwa mwāna ukuya bupāguliligwe kangi lusayo ku mbombo ya Kyala.

<sup>22</sup> Lilino une ngusuma, Tāta, ukuti Ugwe kusayaga u mwāna. Kangi ipyāna lya Kyala lilīsāga pa kēne, kangi akēne kali yaga kakafu kangi kahobofu bōsa bwa būmi bwāke. Kangi u tāta na māma bali yaga būmi ukukēta akēne kakulile, uswe tukusuma kangi. Sayaga akēne uyu uswe tukusaya mu Ngamu Yāko.

<sup>23</sup> Kangi lilino, unnini Stephen Hollin Hickerson, une ngukupa ugwe kwa Yeso Kristi, ukuti isayo isi uswe tsumile sibagile ukwisa pa ugwe. Yaga nkafu kangi gwāmaka, nkūndwe gwāngu unnīni, kangi ugwe ulikulaga ukummwīmika Kyala. Mu Ngamu ya Yeso Kristi uswe tukusuma ikyene. Amenī.

Kyala akusaye ugwe. Kyala abasaye umwe mwēsa. Umwāna unyāfu fīyo.

Kūko uswe tutīsamo siku kukula bakāngāle,  
nasiku ukukula bakāngāle,  
Mu Kīsu kūko uswe tutīsamo siku ukukula  
bakāngāle;  
Nasiku ukukula bakāngāle, nasiku ukulamo  
bakāngāle,  
Mu Kisu kuko uswe tutisakukāngalāmo siku.

<sup>24</sup> Ngimba ikyēne kitisakuya kinyāfu? Abakeke bisakuya bakusi, kangi abakāngāle bīsakuya bakeke. Lilino, ngimba ikyo kitisakuya kinyāfu? Kangi uswe tutisakuyamo siku babine, pamo nasiku ukuya nu busulumanie, pamo nasiku ukufwa.

<sup>25</sup> Lilino, ingomano, Nkundwe Neville afumwisyé. Une ngulonda ukufumusya lilino, nīne, u lukomano lula, komma ukwībwa ulwene, kangī i ngomano isi umwene āyobīlepo. Yópe, u Nka. Ford uyu alīsibile ukwisa ku kipanga ifyinja ifi fikindilepo, une itolo nālimmwegile umwene ku mwanundindwana gwake, amasiku mabili aga gakindilepo, kangī umwene ali ni fyinja malongo lwele mbukusi, kangī alinkubuka ukwagana nu Ntwa ikilo kya mmayolo pa sala ya lwele, une ngwinogona. Kangī ingomano syāke, untimi na une twisakuyaga-nasyo ku bwīpūtilo ku ba Coots Kitata, pa kalongo—kalongo-na-sinda, i Kitatu iki kikwīsa. Nka. Ford, Nka. . . . Une ngwinogona une nibibwe iki umwene. . . . Levi, Nka. Levi Ford. Gwitu. . . . Uyo yo—uyo yo mama gwa Llyod Ford uyu umwe mukuketa mwa buku gwangu, uyu umwēne āyaga pakupoka yila i sūti ya Boy Scout kuli une, kangī une nāli itolo ni kilūndi kimokyēne kisyēle. Lilino, uyo yo—uyo yo mama gwa ndumiana. Polelo une ndinkummwegela umwene ilisiku limo nukummwiputila umwene, i kindu ikipelakisa ikyaiyolo. Kangī umwene alinkubuka ukwagana nu Ntwa Yeso.

<sup>26</sup> Lilino, linga u Ntwa ikwitikisya, une nāli nakyo ikindukimo apa iki une mbagile ukufumusya ukuti amabubōmbēlo, linga agēne gikwīsāpo kuli undungu ugu gukwīsa, linga une ngabīkīle agēne nkati muno, pamo pabunini fiyo une ndinkwīnogōna une nābōmbīle, ukufwāna na iki une nāyāga pa kuyobapo kuli u—u—u bukwīsa, ububōmbēlo ubu bukwīsa bwa ndūngu ugu gukukōnga. Linga une—une ngwinogona. . . . Une ndinkwinogona une nkibikile ikylene mwa buku uyu, une ngamanya kali une mbombile pamo'mma. Ena, apa ikylene kili. U Ntwa itikisyeye, ikilo kya Mpyagilo une ngulonda ukulumbilila pa kimanyisyo kya “Fiki unnyambala yumo ikusōnga u bumi bwa yūngi.” Kangī ulubunju lwa Ndungu une ngulonda ukulumbilila pa “Ikyakitili kya piramidi.” Kangī ikilo kya pa Ndungu une ngulōnda ukulūmbilila pa *Kalōngolēla Gwāngu*, ikimanyisyo, u *Kalōngolēla Gwāngu*, kuli iki kikwīsa ikilo kya Pandungu. Lilino u Ntwa alisayaga ifīndu fila nu kundūla une, pakuti une mfūmile pakuya pānja, kangī itolo akapāngo akanini itolo ukwēga isyēne lōsa.

<sup>27</sup> Lilino ikilo iki, uswe tukulonda ukubopela nukuya nafyo ifīndu ifinandi. Pa lubafu, une ndi na kalata apa uyu—uyu itolo īsile nkati mu bakalata, bo Billy ābapīmbīle abēne pītāsīpo, ukuti abakundwe bamo bali mu Michigan, kangī uyu ikwisa ukufuma ku kibugutila kya balumbilili aba bāli ni findu fingi. Ikyo kyo iki kikutwāla ifīndu ukufubanisigwa mōsa, umwe muketile. Ikyo, abēne bikwīyobēla nkati muno ukuti abakūndwe bāmo kumwanya kula bāyobile ukuti une nābatumile abēne kumwanya kula, kangī abēne bikulūmbilila ukuti abanyāmbāla bikulōndigwa ukuleka abakasi bābo nu kufwīma kuli abīnābo abamwambepo, kangī ukuti—ukuti une ne

nubupelelesye nsitakutoligwa. Ikyo kikayapo nakimo . . . Kangi, o, fimo mwa findu ifinyali ukukinda-fyosa ifi umwe mupilikemo siku. Kangi i kibugutila kyabalumbilili kilinkupilikisya isya ikyène, kangi abène bikunsimbila une u kalata ukufwāna ni kyène, kangi ukuti une nābatumile abène kumwanya kula kangi ikyène kikupela ukufuluganikana kwīngi. Kangi bamo mwa bène bikusolola nukuyoba ukuti unnyāmbāla yumo abagile ukundeka unkasi *uyu* nukubūka ukwega yumo *yula*. Lilino, i kipanga iki kimenye ukuti uswe tutikwima kuli u bubole bwa luko bo lula.

<sup>28</sup> Uswe tukwitika mu li Bangeli. Uswe tukwitika ukuti akabalilo kako unnyambala ikwega unkikulu yumo, uyo yo nkasi gwake, kangi ubufwe bwene bubagile ukupagulania abene. Ikyo kyo kyene. Uswe tutikwitika ifindu fya luko lula bo fila. Uswe tutikwitika mu lugano lwabwābūke, pōpe. Uswe tutikwitika mu findu fila. Uswe naloliloli tukwitika i Bangeli, kangi Ilyo lyene. Popāpo une itolo nisakwēgelēla ikyène, ubwēgelēlo bwa kalata uyu, nu kupa ilyāmūlo lyāngu ku kyène nu kukibīka ikyène mu kalatasi gwa nōngwa, kangi ikyo kisa—ikyō kisa kupakikisya isya ikyo. Une ngusubila ikyene kikubomba, mulimosa, ukwāmūla ku bene.

<sup>29</sup> Lilino ikilo iki, bo itolo tukāli uswe ukwigula i Lisimbo, unko uswe tuyobe kwa Ntwa gwītu.

<sup>30</sup> Tāta gwitu Gwakumwanya, uswe tukusegelēla i Kikota Kyāko ikya kisa, mu Ngamu ya Ntwa Yeso, Yula unkulumba Yula Yuyo āsulwīke pāsī ukufuma ku Lwīmīko ukwibālūla kwa uswe ubukabi bwa findu-fipala ifya Kyala. Mumo uswe tukukupalisya Ugwe panongwa ya unkulumba uyu Yeso Uyu ali yo bubonesyapabwelu bwa Kyala, atendekigwe nubūndu pa uswe, kangi ukwisila mwa Umwēne uswe tuli nu lutabulo ukufuma ku mbibi syītu. Kangi uswe tukilenie lilino ukufuma ku bufwe ukubuka ku Bumi, panongwa yakuti uswe tukwitika Umwene. Kabuno ukwene kusimbigwe isya Umwene, ukuti Umwene āyobile, “Umwene uyu ikupilika a Masyu Gangu kangi nu kummwitika Umwēne uyu ālindumile Une, ali nu Bumi bwabwila; kangi atisakwisa ku bulongi, loli akilenie ukufuma ku bufwe ukubuka ku Bumi.”

<sup>31</sup> Sayaga a Masyu Gako, ikilo iki, Ntwa. Kangi uswe tuli apa ukulya ungonelo itolo nkabalilo akapimba. Bakristi, bīnītu benekaya ba Kitāngalāla bisakubūngāna ukusyūngutila pa kigemo, kangi pala abene bikwegaga iki uswe tukukōlēla “mugonesyo,” a—a kayabo akanini ka—ka sakaramenti iyi Ugwe gwālēkile uswe, ukunāngīsya ukuti uswe tukwitika ukuti Ugwe ufwilwe panongwa ya mbibi syitu, kangi gwāsumwike kangi pisiku lyabutatu, kangi ukuya mumi kwa bwilanabwila, nukubomba iki mpaka Ugwe kugomokela, ukufwana na Masimbo mūmo uswe tukulagililīgwa. Kemēsyağa indumbula syitu ukufuma mminogono amabibi kangi fyosa



ifi uswe tubombile ifi fyali fyakulwanaga nu bwigane Bwako ubukulumba. Tāta, tuswaga uswe, nu kutupa uswe isya ipyāna Lyāko ikilo iki. Menyaniaga kwa uswe lilino u Nkati gwa Bumi, mu Lisyu, mumo uswe tukubala Ilyene nukuyoba pa Lyene. Mu Ngamu ya Ntwa Yeso, uswe tukusuma ikyene. Amen.

<sup>32</sup> Lilino mwa Buku gwa Busetuli, ukwanda ni linandi limolyene lyēne, une ngulōnda ukubala ilinandi lya 20, pamo ilinandi lya 1 lya ntu gwa 20.

*Kangi une ndinkukēta u gwāndūmi ikusuluka pāsi ukufuma kumwanya, ali ni fūngulilo sya kibwīna ikisīta-pāsi kangi nu nnyololo unkulumba nkiboko kyāke.*

<sup>33</sup> Lilino une ngulonda ukuyoba, linga ikyene kikuyaga, linga une mbagile ukukikōlela ikyene ilisimbo ukufuma mu iki, pamo ukwegapo ulwalo ukufuma ku lisimbo ili, ku maminiti malongo mabili pamo malongo-mabili-na-mahano, une ngulōnda ukukōlela ikyēne, *I Fūngulilo Ku Kifigo*. Lilino, une ndikulonda uku—uku tendeka iyene i “fungulilo” panongwa yakuti Peteri aapegigwe “ifungulilo sya Kitangalala.” Lōli une ngulōnda ukukōlela iki: *I Fūngulilo Ku Kifigo*. Kangi polelo mbimbibi ukufuma pa iki, une ngunyonywa ukupa ukuyobapo ukunini pa mugonesyo, bo uswe tukāli ukulya ugwēne ikilo iki.

<sup>34</sup> Lilino, i fūngulilo. Une ngukētésya apa bo uswe tukubala, ukuti u Gwāndūmi yu āsulwike pāsi ukufuma ku Mwanya, ukuya ni fūngulilo nkiboko kyāke. Une ngwitika ikyene kyo Busetuli 13 pamo 19, uswe tukwaga kangi, u Gwāndūmi uyungi ikwisa ni fungulilo. Kangi i fūngulilo yo, fūndo ya fūngulilo, yo ukwīgūla ikindukimo, ikindukimo iki kigalīgwe mōsa, pamo ikyene kyo kindukimo iki kibagile ukuya kigalīgwe lōsa. Lōli i fūngulilo yipēgigwe panongwa ya fūndo yila.

<sup>35</sup> Lilino, lulipo uluko lwīngi lwa fūngulilo, panongwa yakuti uswe tuli na kabōmbelo kīngi ka fūngulilo. Silipo i fūngulilo ku nyūmba sya ndāmba. Yilipo i fūngulilo ya nyūmba yāke gwīmwenē, yilipo i fūngulilo ku ligali lyāko. Kangi uswe tukusikōlela isyēne fūngulilo, kangi isyēne syo fūngulilo. Kangi isyēne sibagile ukubāsanīgwa, kīngi kīngi. Pamo ku nyūmba, pala utubalilo tumo yibagile ukutēndekigwa, iki uswe tukukōlela, i fūngulilo yafifupa. Mmasyu agāngi, iyēne yo mu luko lwa kutēndekigwa ni fyakugōnjēla, fikubōmbēla pa yēne, iki—iki kikuniōngotōla i fūngilo mu njila yimo kangi yibāgile kifuki ukwīgūla kifigo kilikyōsa, yikukōleligwa “fūngulilo yafifupa.” Ikyēne kyo kiyēngēlo kyafifupa kya fūngililo sinyīngi, kangi iyēne yibagile ukwīgūla injila yila, ni nyūmba syītu pamo kōpe ku magali gītu, kibagile ukubāsanīgwa. Kangi polelo yilipo i . . .

<sup>36</sup> I fūngililo yiliyōsa yitikufūngūla ikifigo nakimo mpaka iyēne yikubōmbeligwa ni kiboko. Iyēne yikufimbilisigwa ukuya ni

kindukimo ukuyibōmbèla iyēne. I fūngulilo mu yēne yikabagila ukwībōmbèla yēne. Iyēne yikufimbilisigwa ukuya ni kindukimo ukugōnja i fūngulilo.

<sup>37</sup> Iyēne yo ngati icyākuyobelapo iki kīkyo une—kīkyo une nguyobelapo. Ikyakuyobelapo kila kyo kyakinūnu. Pene pāpo kilipo ikindukimo icyakuyoba ukwisila mu kyēne, icyēne kikabagila ukuyoba ukwisila mu kyēne. Ikyene kibagisenie ukuya ni kindukimo ukuyoba ukwisila mu kyene. Polelo, icyēne kikaya i kyakuyobelapo, ilyēne lyo lisyu pamo i—i unjwēgo (kunyuma) ugu i kyākuyobelapo kikūsōsya ku i—ku luyigo lwa mbepe, ku mbulukutu yāko.

<sup>38</sup> Lilino, iyo yo njila iyi ikyene kiyilile mu kulumbilila Inongwainunu. Ikyene kikaya uswe twibene, ukuya balumbilili, uswe tukaya ba Nongwainunu. Lōli uswe twe itolo bapīsani aba bikupīsania i Lisyu lya Kyala ukwīsila mu butūli bwītu, ubwa banyāmbāla, ku mpilikisi.

<sup>39</sup> Imboniboni yo njila yilayila. Une ngamanya nakimo ukuyoba ku kipanga pa kabalilo aka ukufwana ni mboniboni. Lōli linga u Mbepo Mwīkēmo ābagile ukunāngīsya, icyākwānda, une i mboniboni, polelo une ngupīsania i mboniboni yila kwa yūyo uyu iyēne yitaluligweko. Polelo ikyene kikāli kyangu, une, imboniboni yikāli ya une, une. Ikyene āli Kyala apele i mboniboni, kangī une nābombelaga bo mpīsani, ukutwala panja i ndumi ya mboniboni ku bandu.

<sup>40</sup> Lilino, i fūngulilo yo kindu kimokyēne. Nswaga une. Ifūngulilo ko kwēne itolo ukukolelela nkiboko iki kikwābula i kifigo. Muketile, ikyene kibagisenie ukuya kiboko. Lilino, kangī mu fungulilo une nguyobaga ngapo ikilo iki, kyo ikiboko kimokyene itolo kibagile ukukōlelēla i fungulilo iyi, kangī ikyo kyo kiboko kya lwītiko. Ikyēne kyo kyēne ikindu kibagile—kibagile ukukolelēla ifūngulilo iyi. Kangī ifiboko fikukolelela ifungulilo isingi, kangī ikyene kikwega ikiboko kya lwitiko ku ikyo.

<sup>41</sup> Lilino, uswe tukwēga ngati ifūngulilo ku bumanyi. Lilino, unnyambala ikufimbilisigwa, linga umwēne ikugela ukulūdika ubumanyi, muketile, lilino, kilipo ifūngulilo ku ikyo. Yilipo i njila iyi u nnyambala uyu ikufimbilisigwa ukwigūla losa. Umwēne ikufimbilisigwa ukuya . . . ukwēga amabuku gāke nu kumanyila kwāke, kangī umwēne akabagila . . . nayumo abagile ukumanyila umwēne. Abēne babagile ukumanyisya umwēne, lōli umwēne abagile ukumanyila. Kangī injila yēne iyi icyēne kibagile ukubōmbīgwa, umwēne ikufimbilisigwa ukukōla i fungulilo yila, i kindukimo mula iki kikubālūla pamo kisita- . . . kikusetula ku mwene ubumanyi ubu umwene ikulōndēsya.

<sup>42</sup> Kangī balipo abāndu bīganīle ukugela ukukuba i piano, kangī abēne . . . pamo ubwīmbilo. Abēne bakamanya itolo mūmo abēne bikubōmbēla icyēne, lōli abēne bābagile ukubūka kula

kangi u manyisi abagile ukwēga i kimanyisyo ukufuma pa kimanyisyo, kangi abēne lumo batisamo siku ukumanyila ikyēne. Abēne itolo bakabagila ukukōla i fūngulilo yila ku kyambutitu kila, mūmo amabiti na kōgo ka tyūni na fyōsa bo ifyo fikukuba pānja. Ikyēne kikwēgela i fūngulilo.

<sup>43</sup> Kangi i mbalilo, yilipo i fūngulilo ku mbalilo, iyi ugwe itolo kufimbilisigwa ukwēga ku bwituliko bwa iyēne. Une ngētīle abanyāmbala aba bābagile ukwēga imikolofwa mina gya mbalilo, nu kubika i nyōbe syābo, lulilōsa lwa nyōbe syābo pa lubātiko lwa mbalilo, kangi itolo ukwīsa palapala ukusuluka ngati *lula* kuli lumo imbalilo sihano pamo ntāndatu mbusolofu, nu kubika i lyāmulo pāsi pāke. Ukumasya imikolofya mina pa kabalilo kamo, paliposa ukufuma kimo mpaka fihano-na-fina. Mulimōsa, une nāli na kabalilo akakafu ukupilikisya ululatiko lumolwēne, pene pāpo une ndinasyo inyōbe syakufwāna ni nyōbe-sya-mmalundi ukubala, uku-ukwēga ululatiko lumolwēne ukupilikisigwa. Une itolo ndinkusita kubagilamo siku ukwāga ifūngulilo yila. Lōli, umwe muketile, bamo mwa bēne itolo bali ni fungulilo ya ikyēne, abēne bikumanya akabōmbelo ka ikyēne.

<sup>44</sup> Kangi kilipo ifūngulilo ku bumanyi, u mūndu ukufuma pa bumanyi. Yilipo ifūngulilo kwa sayansi, ifūkulo-fukulo yasayansi. Lilino, kilipo, ikyo kyo fungilo ingulumba. Abāndu bikulōndésya ifūngulilo yila.

<sup>45</sup> Ngati apa akabalilo kamo aka kakīndilepo abēne bāyāgile i atomu, kangi bāmēnye ukuti gāliko ama-atomu, kangi polelo i atomu yābumbīle molekyulu na fyosa bo ifyo. Lilino, abēne bafikilepo kukufukula, umunduyumo ālītike linga i atomu yila yākolelile kilikyōsa palikimo, linga i atomu yābagile ukusanusigwa ukusyūngutila, aba bābagile ukwēga kila iki ikyēne kyākolelelāga nu kukimenyānia ikyēne. Nongwa yakuti, kilikyōsa kikoleleligwe ni atomu, uswe tumenye ikyo. Lilino, i liyēngo lila likoleleligwe na ma-atomu. Ugwe ukoleleligwe palikimo na ma-atomu. Ili lisu, imipiki, kilikyōsa kikukoleleligwa palikimo na ma atomu. Ena, linga i atomu lila, ukusyūmbutuka injila yōsa, linga ikyene kibagile ukubongotoligwa nukusanuka, polelo ikyene kikubongotolaga. Kangi, lilino, abasayansi abakulumba bikwītika ukuti kila kyābagile ukubōmbigwa, kangi abēne balinkubōmba kangi abēne balinkubōmba, kangi abēne balinkwītūgāsya isala ukufuma pa sala, kangi undungu ukufuma pa ndungu, ikyinja ukufuma pa kyinja, mpaka kubumalikisyo abēne baponjolāga ikyēne.

<sup>46</sup> Ikyene kyāli, une ngwitika, Thomas Edison, pa lumuli, ukuti abēne bikuyoba u nnyāmbāla yula āli nu bumanyi ukuti umwēne ābagile ukupela ulumuli lwa bumeme. Umwēne yo mwāti gwa iligolobu lya lumuli. Kangi umwēne akābagile nukubūka kukugon'utulo pa kilo. Umwēne ābagile ukulya ikisyēsye

nkiboko kyāke nu kulya ikyākulya kyāke, nu kwītūgasya pala nu kwīnogòna nu kubōmba. Kubuyobumo ukugomokela kunyuma kwa minogono gake, ikindukimo kilinkumbula umwene ukuti umwene abagile ukubomba ikyene. Ngimba ikyēne kyo fiki? Ikyēne kyo fūngulilo iyi yibagile ukwīgūla mōsa mu njila.

<sup>47</sup> Komma ifyīnja fīngi mma ifi fikīndilepo, ālipo u—u nnyāmbāla uyu umwēne ālītike ukuti umwēne āli nu lwēke lwa kusīngūla utupatu twakusekesya. Umwēne ālītike umwēne ākolelile i fungilo nkiboko kyāke. Kangi umwēne ālōndāga... umwēne ābūkile... Umwēne ātūgasyaga mu Kansas. Umwene alinkubuka ku nsīmbi gwa kalatasi ingulumba mu Kansas City, kangi alinkwega tumo utusimbe twake nkati. Kangi u nsīmbi alinkuti, “Nkulumba, ugwe ukayanakyo itolo ikyene. Ugwe, kukayapo nukulondigwa nakumo ukwakugela, ugwe—ugwe ukabagila ukubomba ikyene.” Lōli kila kikālimmwīkutisye umwēne. Umwēne āmēnye umwēne āli nakyo ikyēne. Kangi umwēne alinkubūka kangi na kangi, ikugela, lōli umwēne (u nsīmbi) āngomosyāga nukunkāna umwēne. Kubumalikisyo, umwene alinkubuka ku mabuyo agangi, kangi abene balinkunkana umwene, bikuyoba, “Nkulumba, ugwe ukayanakyo itolo ikyene. Ugwe ukabagila ukubomba ikyene.” Loli pope umwene aalitike umwene abagile ukubomba ikyene. Kangi iyo yo njila, umwene ali nakyo ikindukimo nkiboko kyake! Kubumalikisyo, umwēne alinkuyāga imbōmbo ya kusīmba utupāngo kuli, une ngwītika, ubusīmbi pamo ikīndukimo kuli i kipānga, u luko lumo lwa kapatu kanini kakusekesya kuli i kipānga. Kangi umwēne alinkwāsima mwēne akayūmba-ka-magali akanini akīsusigwe ni mbeba-syanyūmba pamo imbemba-syandisu, kūko imbeba-syandisu syabopabopāga pa buyo bulibōsa na kilikyosa, mu fikīngo fyāke, kangi umwēne alinkwāga ukukētēsya ubuhēsya bwa kabeba abanini kamo. Pala pa pāpo akapāngo ka Mickey Mouse kāpāpīgwe. Lilino umwēne yo gwamaelifu-elifu-mīngi Walt Disney. Fiki? Umwēne āli nakyo ikindukimo nkiboko kyāke, kangi umwēne āmēnye umwēne ākolile ikyēne, umwēne āmēnye umwēne ābagile ukubōmba ikyēne. Kangi iyo yo njila kilikyōsa ikikulumba ikyabupōnjōli kikupeligwa. Akabalilo kako abanyambala na bakikulu bali nakyo ikindukimo nkiboko kyabo, ukuti abene bamenye ukuti abene babagile ukubomba ikyene.

<sup>48</sup> Akabalilo kāko ubukokonyale bwātikile ikīsu. Pakuti, uswe twēsa tulagililigwe lilino ukubūka ukwakulasigwa ni ndūbi iyi, ukubumasya ubwēne lōsa. Akabalilo kāko u bukokonyale bwātikile... Mmayolo une nāpilikisya u ngānga bo une ngwēndēsya ukukilania pa nsebwe, u ngānga yumo ukufuma ku Louisville. Umwēne alinkuyoba, “I fyīnja ifināndi ifi fikīndilepo, akabalilo bo ikiswīgu ikikulumba kyātikile Louisville,” alinkuti, “linga abanyāmbala babāgile

ukwīma pāpo une nālīmīle, kangi nākētīle ifyakutūyila malongo-mahano-na-fihano-na-fibili pa kabalilo kamokēne, kangi abanyāmbāla, abakīkūlu, abalumiana na balīndwāna, bakokonyēle ni mbūngo iyi yākoleligwāga ‘bukokonyale,’ kangi kikālipo nakimo ikyākubōmba ukufwāna ni yēne.” Alinkuti, “Une ndikulonda ukuketa ikindu bo ikyo kangi mma.”

<sup>49</sup> Lōli sayānsi yālinogwīne, “Linga bulipo uluko lwa bubībi bo bukokonyale, naloliloli pabagīle ukuyapo ikindukimo ukulwāna ni bwēne.” Abēne balinkulwa, abēne balinkwīma pa ngīndi ni filato, bala abanyāmbala balwamoto, abēne bālīnkufwāla ifitili pānja, kangi abēne balinkupepeka, abēne balīnkusūma, abēne balīnkubōmba kilikyōsa, ukugela ukwāga i fūngulilo ukwīgūla i kifigo ku bwābūke. Kangi, kubumalikisyo, u nnyāmbāla gwa Kikristi yumo ni ngamu ya Salk alinkuyāga i ndūbi yila. Fiki? Bwālipo ububībi palapala, kyālipo ikigogi palapala; yālipo i fūngulilo pabuyobumo iyi yābagīle ukwīgūla ubwābūke kangi kuli u mūndu, kangi i ndūbi ya Salk yāli nkota unkulumba. O, kyo kiliku i fūngilo yibagīle ukubōmba! I ndūbi yātwaligwe pānja, kangi lilino yikumasya u bukokonyale ni ndūbi iyi, panongwa yakuti iyēne yāli i “nasiku ukukatala kangi nasiku ukulekesya,” i fūngulilo yila yālāmbalēle pabuyobumo. Pala kyālipo ikindukimo kyābagīle ukupolesya ukufuma ku kyēne, kangi abēne basisimikisye ukuyāga iyēne.

<sup>50</sup> Kangi linga bulipo ububībi bwa ulo bo bukokonyale, dipiteria, ifilōnda fyamumbili, isekema ya kiyīnja, tetenasi, lojojoo, na fyōsa bo ifyo, ifi sayansi, ifibibi ifi, yifumile ukubagila ukulwana, pamusi na pakilo, mpaka abēne bakyāgīle ikipolesye ukufuma ku kyēne, panongwa yakuti ikyēne kyo kibībi, ikyēne kyo kigogi, bo bwīngipo buki bo yilipo i fūngulilo ku bupoki kuli u nnyāmbāla uyu yo ali mu nyūmba ya minyololo ya butulwanongwa? Yilipo ifūngulilo ku kifigo kila, ukwābūla abanyāmbāla ku kyēne.

<sup>51</sup> I fūngulilo, bwīla, akabalilo kāko ikyēne kikusyūmbutūsyā i fūngulo, kangi, akabalilo kāko ugwe kuyāga ifūngulilo, iyēne yikufimbilisigwa ukuya kimo ubukabi, ikindukimo iki kyo kyabukabi, kisa ikyo ugwe āngālī utikwīgala ikyēne mōsa. Linga ikyēne kitikufikapo ukufūngigwa lōsa, itolo kileka ikyēne kibūkege. Lōli akabalilo kāko ikyēne kifikilepo ukufūngigwa mōsa! Popāpo i fūngulilo yo i–i ngētēsī ku kindukimmo, pamo i njila ya kwīngilīla ku kindukimo iki kyo kyakubagilīla. I fūngulilo, ikyo kyo iki ikyēne kili, lilino, ikyēne kisa kwīgūla ikindukimo iki kya kyakubagilīla.

<sup>52</sup> Lilino uswe tukubala mwa Mwikemo Yohani, untu gwa 10, Yeso aatile, “Une ne Kifigo ku kibaga kya ng’osi. Une ne Kifigo,” komma *a* kafigo, “*i* Kifigo, *i* Kifigo kyene. Une ne Njila, *i* Njila yene, u Bwanaloli, kangi u Bumi, kangi nayumo umundu ikwisa kwa Tata loli ukwisila mwa Une. Une ne Kifigo ku kibaga kya ng’osi kangi fyosa ifi fikwisa pankyeni pa Une bo balugu,

abahiya na banyambuta.” Umwene yo Kifigo ku kibaga kya ng’osi. Umwene yo Kifigo ku bupoki.

<sup>53</sup> “Yikayapo nayimo i ngamu iyingi yipëgigwe pāsi pa ku Mwānya kũko umwe mubagile ukupokigwa, kwene ukwisila mu Ngamu ya Yeso Kristi.” Nakimo i kipānga, nakimo kipāngakipāgũke, kisita kimanyisyo, komma ifimanyisyo fya kalikosa; kwene ukwisila mu Ngamu ya Yeso. Iyo yo—iyo yo Fũngulilo. Fyõbene Peteri ābagile ukubõmbēla yumo mwa bēne pa Lisiku lya Pentekosti! Abēne bālõndāga ukumanya akafikilo ka Kifigo kila. Umwēne ābõmbīle i Fungilo. Kangi yilipo itolo i Fungulilo yimoyēne, nongwa yakuti yilipo itolo i Kifigo kimokyēne. “Une ne Kifigo.” Kangi Peteri āli ni Fungulilo ku Kyēne. Kangi umwene alinkuti, “Pinduka, aligwesa gwa umwe, kangi yaga bõsigwe mu Ngamu ya Yeso Kristi ku busyũle bwa butulwanongwa bwinu, kangi umwe mwisakwambililaga ubukabi bwa Kyala.” Ikyēne kyo Fungulilo ku Kifigo, kangi Yeso yo Kifigo.

Kilipo i Kifigo kimokyene ku bubumbulusyo, kangi Yeso yo Kifigo kila.

<sup>54</sup> Kilipo i Kifigo kimokyene ku lutengano. Ena. “Lwangu ulutengano Une ngupa kwa ugwe.” Umwene yo Kifigo kimokyene ku lutengano lwabwanaloli. Ugwe ubagile ukwinogona ugwe uli nu lutengano. Ugwe ubagile ukulũndika ihela syakufwāna ukũla inyũmba yāko, ugwe ubagile ukulũndika ihela syakufwāna ukukaba abānako imyēnda, ukuya ni kyakulya ikyakulya, loli ugwe ubagile ukwibungania ubufumuke ubwakufwana ukuya mfumuke pakati pa bandu. Lõli linga akabalilo kāko ugwe kufũla ifilato fyāko pakilo kangi kwītendekēsya ukulāmbalala pāsi, kilipo i Kĩndu Kimokyēne kibagile ukupa ugwe u lutēngāno. Ikyo kyo, linga ugwe umenye ugwe gwāfwāga ikilo kila, lulipo u Lutēngano lumolwēne itolo, kangi, ikyo kyo, Yeso yo Lutengano. Umwene yo Lutengano lwitu.

<sup>55</sup> Umwene yo Bubumbulusyo bwitu. “Une ne Ntwa gwāko Kyala uyu ikubumbulusya imbungo isyĩnu syosa.”

<sup>56</sup> Umwene yo Kifigo ku Mwanya. Kangi kikayapo ni kifigo ikingi pamo injila iyingi loli ukwisila mwa Yeso Kristi. Umwene yo Kifigo ku Mwanya.

<sup>57</sup> Kangi lilino Yeso yo Kifigo ku findu fyosa ifi, kangi u lwitiko lo fungulilo iyi yikwabũla i Kifigo. Lilino, linga Yeso yo Kifigo ku fingo syosa isi sya Kyala, lwītiko mu Yāke imbombo imalisigwe lukwīgũla ikifigo kilikyõsa ku bukabi bulibõsa ubu bulimo nkati mu Kitāngalāla kya Kyala. Mukikēta ikyēne? Fũngulilo yo...Lwītiko lo fungulilo iyi yikwabũla ulufĩngo lulilõsa Umwēne ikutēndēka. I fungulilo ya lwītiko yikubõmba ikyo, lwītiko mu mbombo Yāke immalisigwe. Isyene syo fungulilo isi uswe tukuyobapo.

<sup>58</sup> Lilino mu Bahiburi, untu gwa 11, une ndinago undisi unkulumba gwa bēne nsĩmbíle pāsi apa, ugwa baponjoli ba lwítiko aba. Ikyēne kyāli fungulilo, ku—ku Kifigo, ikyo kyālímíle akanwa ka ngalamu. Ikyēne kyāli fungulilo, lwítiko, lulo lwalwígwile i nyumba ya minyololo. Ulwene lwāli lwítiko, i fungilo ya lwítiko, iyi yāsimsiye ubukali bwa moto, bābōpíle ulwembe lwa lūbo, lwātwele abafwe ukugomokela ku būmi kangi. Ulwēne lwāli lwítiko, ifūngulilo ya lwítiko mwa Kyala gwābūmi. Ikiboko kila, u nnyambala yula, u nkikulu yula, uyu abagíle ukwega i fungilo ya lwitiko, abene babāgíle ukwígula ulufingo losa Kyala áténdíke. Lōli linga ugwe ukaya nayo i fūngulilo yila, ugwe kubunabuna itolo, ugwe utisakwígulāmo siku ikyēne. Ugwe kwisa kung’apa ku kyēne, panongwa yakuti ifūngulilo iyi. . .

<sup>59</sup> Yōsa i fūngulilo indendekigwa nubutalusi yili ni fyakugōnjela nkati mwa fūngilo, kangi iyēne yikwēga ububūmbigwe bumo, ububonekelo bumo bwa fūngililo sila ukusyūmbutusya ifigōnjelo fila. Kangi itolo akagōnjelo kamokene panja pa njila, kisakōnānga ikindu kyōsa lōsa.

<sup>60</sup> Polelo, une ngwitika mu Nongwainunu yōsa, i Lisyu lya Kyala lililyōsa, ili likusyūmbutusya amaka ga Kyala ukwābūla, ili likusyūmbutusya isayo Syāke ku bāndu. Iyēne yo fūngulilo ku Kifigo, iyi yikwígula Ikyēne. O, abaponjoli abakulumba bala, abasololi na banyambala abakulumba aba i Bangeli, aba bāli ni fūngulilo! Iyo yo nongwa abēne bābagíle ukwimika akanwa ka ngalamu, ukusimisa ubugāsi bwa mōto, ukubopa ulugēnge lwa lūbo, ukutwāla abafwe ukugomokela ku būmi kangi, kangi ukubōmba uluko lōsa lwa fiswigo, yo nongwa yakuti abēne bākolelile i fūngulilo yila kangi abēne bāmēnye ikyēne kyābōmbāga, panongwa yakuti iyēne yāli fūngulilo i mbāpigwe-Mmasimbo.

<sup>61</sup> Lilino, linga une ngukindilila pa fūngulilo ya kimanyisyo kimo, une ngamanya iki ikyene kisakubombaga. Linga abene bikuyoba “ikipanga kyangu kikumanyisya *iki*,” une ngamanya isya ikyo.

<sup>62</sup> Lōli akabalilo kāko i Bāngéli likumanyisya ikyēne, kangi une ngukoleléla u i fūngulilo ya lwítiko nkiboko kyāngu, pamo mu ndumbula yāngu, uyu ikuyoba “ilyo lyo Lisyu lya Kyala,” ili lisakusimisa ubugāsi bwa moto, ili lisakwígula ububūmbulusyo kuli ababine, ilyēne lisakwígula ubupoki ku bayōnge. Une ngufimbilisigwa ukwisa ku Kifigo, kilikyōsa kili mu Ngamu Yāke. “Kilikyōsa ugwe kubōmba mu lisyu pamo mu mbombo, bōmba ikyēne kyōsa mu Ngamu Yāke.” Tumenye ukuti ifūngulilo iyi ugwe uli nayo lo lwítiko, panongwa yakuti ikyēne kyo fungulilo indendekigwa-Mmasimbo. Lilino, linga iyene yo fūngulilo ya kimanyisyo, ifūngulilo yafipanga-fipāgúke, une ngamanya iki iyēne yisakubōmba. Lōli linga iyēne yo fūngulilo ya Mmasimbo, ikyēne kikwígula, panongwa yakuti

Kyala āyobīle lūlo. Lilino, o, fyōbène abene bābagīle ukwimika u bugasi bwa moto, na fyosa bo ifyo, abene bāli ni fungilo.

<sup>63</sup> Ukwitikisya kumokwēne kwa Kyala kwa yumo gwa basololi bala, nakimo kyābagīle ukubīmika bala. Umwēne akāfimbilisīgwaga ukubōmba ngati Umwēne ikubōmba kwa une akabalilo kamo, ukutika icyēne ukwāndisya nu kwāndisya, kangī lumō umwe (Une ngusūbīla mma), loli ukumilisa ukumbula une, “Buka kabombe iki,” kangī polelo ugwe kwisakwitabaniamo, “Polelo bukaga kabombe *iki*,” kangī “Buka gomokela kangī kabombe icyene kangī, ugwe ukābōmbīle icyēne kanunu.” Itolo ukwitikisya nuntu ukunini! Itolo, abene babagīle itolo ukwipilika u Mbepo ikubabula abene, “Ikyene kyo kindu ikyakubomba,” kangī nakimo kikuyaga pakubīmīka abēne. Nkundwe, abēne—abēne—abēne bālimīle akanwa ka ngalamu, abēne babōpīle ulugenge lwa ngwēbo, abene bāsīmīse umoto, abene babombīle kilikyosa. Itolo ukwitikisya nuntu ukunini ukufuma kwa Kyala, panongwa yakuti abēne bakolelélaga ifūngulilo nkiboko kyābo, lula ulwītiko ulukulumba! Abēne bābōmbīle i findu kwa Kyala panongwa yakuti nakimo kisakubīmīka abēne. O, kyalwīmīko bule!

<sup>64</sup> Ngati u nnyāmbala unkeke akabalilo kamo ālīsīlepo ku nkūndwe unkāngāle uyu āli nnyāmbala ugwabunyakyala unkāngāle, u nsololi unkāngāle gwa Kyala. Kangī umwene alinkupilika u nnyambala yula kingikingi ikubīkīla ubuketi, kingikingi ukuyoba isya bununu bwa Kyala, kangī mūmo fikuti Kyala āli, kangī iki Kristi āli, kangī itolo ukukindilila, ikuyoba. Kubumalikisyo, unnyāmbāla unkeke uyu āyāga pakusayiligwa mu butumīgwe, popāpo umwēne alinkwīsapo kwa uyu unkulumba unkāngāle, kangī umwene alinkuyoba ku mwene, “Nkulumba, une ngulonda ukukulalusya ugwe ililalusyo.”

Umwene alinkuti, “Ndalusya, ndumiana untubwa.”

<sup>65</sup> Umwēne alinkuti, “Ngimba Kristi naloliloli ikusanusya na bubwīngi kwa ugwe bo mūmo ugwe kuyoba Ikyēne kikubōmba?”

<sup>66</sup> Umwene alinkuti, “Umwene ikusanusya ukukindapo kwa une ukukinda iki une mbagīle ukuya nu mūyi ukuyoba!” Mwaketa lelo umwe. Ngimba icyēne kyo fiki? Umwēne āyāgīle ifūngulilo.

<sup>67</sup> Unnyambala unkeke yula alinkuyoba, pa ikyo, “Linga ugwe kuyoba ifindu ifi, kangī ugwe kuyoba kwa une ukuti ifyene fyo fyānaloliloli bo ugwe, polelo une ngulonda ukumanya yula Yeso yulayula, mu bwanaloli bulabula.” Ngimba icyēne kyo fiki? Umwēne āmēnye u nnyāmbāla unkāngāle āli nu bukolelelo bwa i fūngulilo, ukuti umwēne ābagīle ukwīgūla kangī ābagila ukwīgāla mōsa.



68 Umwe mumenye, ifūngulilo iyi yikufūnga, yikufūngula, yōpe. Muketile? Ugwe ubagile ukwabula pamo ukupinya. Uko ko kotalusya. I fūngulilo yilayila iyi yikufūnga, yikufūngula. I fūngulilo iyi yikufūngula, yibagile ukufūnga lōsa. Kangi ikyo kyo katikati, muketile, nongwa yakuti ikyēne kikubōmba itolo injila syōsa. Mūmo kiyilile kipelakisa ikyēne kili i kipānga kitāgilēmo siku imboniboni yāke iya ikyo! Kyo kīndu ikisulumanisye nki ikyēne kyāli akabalilo kāko i kipānga kyāligulisye kyēne ku fimanyisyo, bo mūmo uswe tubōmbile umwisyūgu, kangi lilino kikōlēla ukuya yumo.

69 Uswe tukētīle kūko ubukulumba ubwapamwanya bwa kiRoma na bala bikuya pakwāgāna lilino, abēne bikuyaga pakwāndūla imbātiko simo. Une ndinkwinogona abene bakālyāndwile; loli abene bikuyaga, mulimosa, ukupa u mpūti aligwesa a maka ga pāpa, kangi—kangi kulikosa umwēne aliko, na fyosa bo ifyo. Kyo kipelakisa nki, ukuti i kipānga kyāliyūlisyēmo siku ku nyiho mbuyo bwa Lisyu. Muketile? Apo po pāpo abēne bālekile ifūngulilo, palapala pala. Iyo yo nongwa i fika ifikulumba kangi i fimanyilo fitikubombigwa pakati pa bandu umwisyugu, ifi fyalisibile ukuyako, abēne batāgile ifūngulilo! Ena, abene bamenye i Kifigo, abene bikumanya i Kifigo kili pala, loli ikindu ikikonge kyo fūngulilo ukwīgūla i Kifigo. Ifyuma fili kunyuma ku Kifigo. Ifyēne fifūnguligwe lōsa, panja pa bukētēlo, ukufuma kwa nsitamwītiki. Lōli u mwītiki, uyu ali nu lwītīko kangi abagile ukwega i fūngulilo ya lwītīko, abagile ukwīgūla i Fifigo ifi. Ena, nkulumba.

70 Akabalilo kamo apa ifyinja finandi ifi fikindilepo, aalipo unkundwe gwamisyoni, kangi umwene aaliipilike ukuti umwene aali nu bukooleligwe ku Africa. Umwene ali mwinitu unkeke; unkasi na bana babili, abammogi fiyo, balindwana banini, ukufwana ifyinja fihano-na-fibili pamo lwele mbukusi, aligwesa gwa abene. Kangi u mwīnitu unkeke uyu alinkutoligwa ukusōka ku kyēne. Umwene āli u—u ndumbilili, umwene āli ni kipanga ikinunu nkisu. Lōli umwēne itolo akābagile ukusōkāpo ukufuma ku bukōlēlo bula, umwēne “ābagile ukubūka ku Africa.” Kangi umwēne alinkwīputa, pamusi na pakilo. Umwene akālongaga ukubuka. Kangi Kyala alinkūmilisya ukuyoba ku mwene, “Ugwe kufimbilisigwa ukubuka!” Kangi kubumalikisyo umwene alinkwisa ku buyo mpaka umwene, ububonekesyo, kuko, umwene—umwene ikufimbilisigwa ukubuka!

71 Polelo umwene alinkubuka ku kitapwa kya misyoni kya kipanga kyake, kangi umwēne alinkuti, “Kyala āngōlile une ku kibanja kya misyoni kubutali kunyuma mmatēngēle ga—ga Rhodesia.” Kangi mmatēngēle aga ikyēne kisusigwe ni mbwēle, ni sekema kangi nu lumu ulupyāno lula, imbūngo nu bukoma, nu luko lōsa lwa mbūngo kunyuma mu litēngēle ili, kuyēge kūko umwēne āyaga pakutēndēka. . . ukwēgēla ubusyāle bwa būmi bwāke. Alinkūlisya inyūmba yāke na fyōsa umwēne āli nafyo.

Popápo i kitapwa kya misyōni kilinkulōnda ukungela umwēne, kangī abēne balinkuti, “Ngimba ugwe usisimikisye?”

Umwene alinkuti, “Une nsisimikisye.”

<sup>72</sup> Abene balinkuyoba ku mwene, “Nkulumba, ngimba ugwe gwinogwine ikylene pa njila iyi, ukuti ugwe uli na balindwana banini bamogi, kangī ugwe uli nu—nu nkasi unnunu unkeke, kangī linga ugwe uli itolo. . . Nongwa ya fiki ugwe utikubuka itolo kula nukukēta mūmo ikyēne kili kangī polelo gomokela?”

<sup>73</sup> Umwene alinkuti, “Umma, u Ntwa ambulile une. O, ikylene kyo kyanaloliloli fiyo!” Umwene alinkuti, “U Ntwa angōlile une. Kangī une—une ndikulōnda ukuleka a kāya kāngu, une ndikulōnda ukuleka i kipānga kyāngu na bāngu, loli u Ntwa angōlile une kunyuma kula mu mmatēngēle gala.”

<sup>74</sup> Kangī umwēne alinkuti, “Nkulumba, ngimba ugwe umēnye abalīndwāna bāke abanīni babagile ukwāmbūla i sekema ya kiyīnja pamo i sekema ya mīsi amatītu, nu kufwa, ukukilania nkilo?” Kangī umwene alinkukumbusya abandu abakindane aba batagile abana babo, abinitu abanini, ukwēga bala kunyuma nkati mula, pa mbūngo isi abēne bakāli ni ndubi nayimo. Kangī alinkuti, “Inogona isya bukoma, ubwa nkasi gwāko ummogi kangī abalīndwāna bāko abanini nu bukoma, kangī ulumo ulupyāno lula ni fīndu ugwe kufīmbilisigwa ukwitūgala nafyo.” Alinkuti, “Ngimba ugwe utikutīla, kangī i soka ya kwēga abāna bāko nu nkāsigo mbuyo bwa luko ulu?”

<sup>75</sup> Kangī ugwamisyoni aalimile pala, umwinitu unnini, kangī amasosi galinkwana ukwendelela pasi pa masaya gake, umwene alinkusyumbutuka ukusyungutila, umwene alinkuti, “Bakundwe bangu! Imboniboni yangu iya kukōlela,” umwene alinkuti, “linga Kyala angolīle une ku Africa, abāna bāngu ni nyūmba yo yiponesigwēko kanunupo mu Africa ukukīnda ubuyo bulibōsa nkīsu.” Ameni. Ngimba ikylene kyāli fiki? Umwene āli ni fungulilo ku bukōleligwe bwāke, umwene āli nu lwītīko mu iki umwene ayobelaga ngapo. O, une ndinkwinogona, yo buyobelo bwabukifu buki! Akabalilo kāko une akākwānda nāpilike ikyo, indumbula yāngu yilinkunyēla. Muketile, “Linga Kyala angolīle une ku Africa, a bāna bāngu mu bukoma kangī ikiswigu na filifyosa i fingi, abēne baponesigwe kanunupo ukukīnda ubuyo bulibōsa ubūngi pa kisyo kya kīsu.” Umwēne āli ni fungulilo. Ikyo kyo iki ikyēne kikwēga.

<sup>76</sup> Akabalilo kāko ugwe uli ni fungulilo, kukayapo nu lutende, kukayapo ukwīlāmwa, kukayako ililālūsyo. Ugwe utikufimbilisigwa ukunsuma aligwesa uyungī ukufwana ni kyene, ugwe umenye katikati. Ugwe uli nakyo ikylene mmaboko gako, ugwe umenye ikyakubomba. Ameni. Ugwe umenye iki ikyakukōnga kili, ugwe umenye i kifigo kikuyaga pakufūngūla. Ugwe ukētēsisiye ifyakugōnja fyōsa kangī ugwe umenye ikyēne

kyo naloliloli kīndu kitalusye, i kifigo kisa kisakubeleluka kīguke akabalilo kāko kusopamo i fūngulilo mwa ikyēne.

<sup>77</sup> O, linga ikipānga itolo kyāpokile i fūngulilo! Linga i kipanga itolo kyāpokile ifūngilo yila iya lwītiko, uswe twābagile ukufūngula i kifigo kilikyōsa, ububine bulibōsa, ikigwāya kilikyōsa, i mbūngo yiliyōsa iyi yiliko. Ikyēne kyābagile ukufūnguligwa kwa uswe linga uswe twābagile itolo ukuya ni fūngulilo iyi. U nnyāmbāla uyu āli ni fungilo ku bukōlélo bwāke.

<sup>78</sup> Linga umwe mwisa kunswaga ubukēti bwapanīmwenē. Une ngukumbukila ukufwana ifyinja kalongo na fihano, kalongo na fihano na fibili ifi fikindilepo lilino, kifuki, akabalilo kako u Ntwa aayobile kwa une pasi pala pa kisoko, akabalilo kāko Umwēne ālisile pāsi mu Mbanda ya Moto yila ikipikicha kya Yīyo umwe mukukēta, kangi Umwēne āyobile kwa une kangi Umwēne alinkuti, “Ugwe gwe gwakwēga i Ndumi iyi ukusyungutila ikisu.”

Kangi une ngukumbukila ku Kigayo kya Green akabalilo kāko Umwene ayobaga kwa une.

<sup>79</sup> Kangi une ndinkubūka nukumbula u ntimi, kangi umwene ālimbulile une, alinkuti, “Billy, ngimba ugwe gwālile fiki ikilo kila? Ugwe gwāli ni njosi-imbibi.” Umwēne alinkuti, “Kindililaga gomokelaga ku mbōmbo yāko. Ugwe kubōmba ku Public Service Company, uli ni mbōmbo innunu, bukāga kīndililaga gomokela nu kupākisya iyāko—iyāko imbōmbo, mwanundumiana.” Alinkuti, “Ugwe gwāli ni njosi-imbibi. Ugwe ulile i kindukimo.” Kila kikālimfubēnie une na panini!

<sup>80</sup> Akabalilo kako une ngwandako kuli i mbōmbelo sya bubumbulusyo, mwe bingi ba umwe apa mukukumbukila Indumi yangu ulubunju lula, *Bomūmo Davidi Abūkile Ukwāgana Na Goliati*, une nālumbililepo.

<sup>81</sup> Kangi abene bālimbulile une, umwēne alinkuti, “Mu lisiku lya sayansi gwamwisyugu, akabalilo kako uswe tukuya nu luko losa lwa fukula-fukula gwa mikota, akabalilo kāko uswe tuli nabo abagānga abanunu-fīyo, akabalilo kāko i kipānga kibībwe patali u bubūmbulusyo Bwamwakyala ni fīndu ukufuma fīngi, fīngi ifyinja ifi-fikīndile, ngimba ugwe kubūkaga bulebule pankyēni pa ikinywāmu ikikulumba ngati ikyo? Ngimba ugwe kuyaga pakwēnda pānja bulebule nkisyo kya ba Methodist, Baptist, Presbeteri, na fyosa, kangi bōpe abaPentekosti, aba bībībwe ikyēne akabalilo katali aka kakīndilepo, kangi bābūkile mfimanyisyo fyābo? Ngimba ugwe kubuka bulebule ukukētāna, kisita kipanga-kipāgūke pamo nakimo ikingi ukukutūla ugwe mōsa? Ngimba ugwe kubombaga fiki, Bill?” Mu luko lumo, ulūngi, ikyēne kikālimfubēnie une na panandi, kabuno une nākolelile nkiboko kyāngu i fūngulilo! Une ndinkuti . . . Abene balinkuti, “Nayumo isakwitikaga ugwe.

Ugwe utikuyaga gwakubagila ukubomba icyene. Nayumo isakukukwitika ugwe.”

<sup>82</sup> Une ndinkuti, “Une ndikupasya. Kilipo ikindu kimokyene ikyanaloliloli; Kyala ālingōlīle une, kangi une mbagīle ukubūka panongwa yakuti Kyala ālingōlīle une.” Une nākolēlīle ifūngulilo. Umwēne ālingōlīle une, Umwēne ālināngīsye une, Umwēne ālimbūlīle une, kangi une nakubwēne u Kuyapo Kwāke akabalilo kāko Umwēne ālindagīle une, kangi i fūngulilo yāli pala!

<sup>83</sup> U ntimi alinkuti, “Nu bumanyi bwa kalasi ya buhano-na-mabili, kangi ugwe kuyaga pakulūmbilila nu kwīputa pankyeni pa banyafyāle na babunyafyāle!”

Une ndinkuti, “Ikyyo kufwana ni Lisyu Lyake!”

<sup>84</sup> Ukufwana kabalilo aka nkyinja, pamo u ndungu pamo mibili pabutasi, akabalilo kako une nisege ku kipanga apa nukubabula umwe ukuti u Ntwa Kyala ālimbēle une i mboniboni, isya kubūka ukwēga ubwendelo bwa kufwima, kangi i—i kinyamana kimo une nayaga pakukyaga, iki kyayaga ni mbembe mainchi-malongo-mana-na-mabili pa kyene. Kangi pa nsebwe ukugomokela ukufuma ku kwēga ikinyamana iki (kūko icyēne kyāyaga pakulāmbalāla, ubuyo icyēne āngāli kikuyamo), pa nsebwe ukugomokela une nāyāga pakugoga ikindingo kya siliva-kūsulo ikifubīfu. Kangi une nābūkīle ku kiyabo kimo iki, kangi une nāyobīle ku nnyāmbāla, kangi umwene alinkuti, “Une ngamanya isya kinyamana kilikyosa iki kikuboneka bo ikyyo. Kangi ukufwāna ni kindingo unfubīfu, une ngakibonamo siku kimo.”

Une ndinkuti, “Loli ku buyo bumo icyēne kikufimbilisigwa ukuya apa.”

<sup>85</sup> Popāpo umwēne alinkuti, “Uswe tutikubūka na nkīsu kya fīndingo. Uswe tukufyuka mmwanya kuli ng’osi, kubutali mmwanya pamwanya pa bakekamatapwa.” Ena, une ndinkubuka nu mwene.

<sup>86</sup> Kangi i lisiku lya kibili panja, pa buyo bulabula, katikati kūko u Ntwa āyobīle, pala kyālāmbalēle ikinyamana. Polelo akabalilo kako une nabukile nukwakwega ikinyamana, kangi akabalilo kosa aka uswe twegaga ikipapa ni mbembe na fyosa bo ifyo, ukusookapo, umwene alinkuti, “Une ngulonda ukukulalusya ugwe ikindukimo. Ugwe umbulile une, amasiku matatu aga gakindilepo akabalilo kako uswe tulekege u—u bugonelo, ukuti ukufuma papo ugwe gwaatusulile ikinyamana kimo iki, ukuti pa nsebwe ukugomokela ugwe gwa ‘bukaga ukungoga u kindingo unfubīfu gwa siliva-kūsulo.”

Une ndinkuti, “Uyo yo ISI SYO IKUTI U NTWA!”

<sup>87</sup> Alinkuti, “Une ndikwīlamwa mma,” umwene alinkuti, “panongwa yakuti u nkundwe gwangu āli gwāfīsilisi,

kangi ugwe ukaalimbwenemo umwene siku mbumi bwako, akabalilo kako ugwe gwāli pamwanya apa akabalilo kamo, kangi ugwe gwālimbūlile une ukuti undumiana yula ayaga pakubumbulusigwa akabalilo kako une mbombile ikindu kimo. Kangi umwene aali.” Umwene alinkuti, “Lilino, loli, Nkundwe Branham, une ngulonda ukukulalusya ugwe,” umwēne alinkuti, “Une mbagile ukukēta yōsa i njila kubutali ukusuluka i kyāmba kila kūko ulukindi lwa matapwa luli, ifalasi sila sīmile. Kangi kukayako nakimo kula. Kula kukayako na kapatu ka lisu, kula kukayako i lyālabwe, kula kukayako nakimo.” Ubulēnge bwa caribou, ubu buli kifuki mainchi mabili ubutali, pamwanya pa lukindi lwa matapwa, kuli i mailo pamo mīngipo pamwanya pa lukindi lwa matapwa. Alinkuti, “Ko kugu i kīndingo kukuyaga?”

<sup>88</sup> Une ndinkuti, “Kyala yo Yehova-yire. Linga Umwene ambulile une pisakuyaga kindingo pala, pabagile ukuyapo yumoywene pala.”

<sup>89</sup> Pāsi pa kyāmba, kifuki akabalilo kōsa uswe tukulyāga sinda gwa mailo pamo popāpo, kifuki, umwene alinkuti, “Nkundwe Branham, kifuki akabalilo kala ukuti ikindingo kila kibonekege.”

Une ndinkuti, “Komma ukupasya, umwene isakuyaga apa.”

<sup>90</sup> Kangi akabalilo kako uswe twali kifuki nkati mwa ma yādi bamia bahano iya kūko i falasi syāli, uswe twafimbilisigwaga ukutusya kangi ni mbembe i nsito ni findu pa nyuma yitu. Kangi umwene alinkukelengania kangi, kangi une ndinkukibona ikisyo kyake bo umwene angetile une, kifwene ngati pasi pa ndumbula yake umwene aswigaga. Muketile, umwēne *āsūbile* ikyēne angali kikuya kula, lōli umwēne akāli ni fungulilo.

<sup>91</sup> Lōli mu njila yimo, ukwisila mu lipyāna lya Kyala, Umwēne akandoligwāmo siku une. Akabalilo kāko Umwēne ālimbūlile une kula āngāli kukuyako i siliva-kusulo kula, une nāli ni fūngulilo. Une ngālilāmwire ikyēne na panandi, na panandi mma. Une ndinkusyumbutuka ku mwene, kangi une ndinkuti, “Bud, ikyene kukuyaga kula.” Kangi itolo bo une ngusanuka, pala kyālipo ikindingo [Ubuyo busitakandu pa tepi—Nsimbi] imile pamwanya pa uswe, ukufwana sinda gwa mailo.

<sup>92</sup> Umwene āsopile amandalasi ukufwāla, umwene alinkuti, “Billy, polelo ndula une, ikyene kyo siliva-kūsulo unywāmu!”

<sup>93</sup> Muketile, ifūngulilo, imboniboni, i Lisyu lya Ntwa, kikayapo nakimo kibagile ukwāndula Ilyēne pamo ukwīmika Ilyēne. Iki ikipanga kikulondigwa ikilo iki kikaya bumanyili mma. Iki ikipanga kikulondigwa ikilo iki kikaya kyo kipanga-kipāgūke. Iki ikipanga kikulondigwa ikilo iki kikaya kimanyisyo mma. Iki ikipanga kikulondigwa ikilo iki kyo fungulilo ku Masimbo, i Kifigo. Iki, Kristi yo Kifigo, kangi Umwene yo Lisyu. Lwītiko mu Lisyu lya Kyala gwabumi lukwīgūla i kifigo kilikyosa.

Kyala, tupapo uswe ifūngulilo. Tupapo uswe ifūngulilo.

<sup>94</sup> Abahiburi, untu gwa 12, ikuyoba, “Ukukéta ukuti uswe tusingutiligwe ni libingo ilinywamu ilya baketi, unko uswe tulāmbalike palubafu ubusito bulibōsa, kangi u busitakwītika ubu nalōli fiyo nubupepe bukutupēsya uswe.” Ilyene likuyoba “ubutulwanongwa,” iki, *butulwanongwa* bo “busitakwitika.” Muketile? Ubutulwanongwa bumobwene itolo, ubu bo busitakwitika.

<sup>95</sup> Kangi *butulwanongwa* bukusanusya “ukupondwa i kingw’ale.” Tutigi ugwe kulusulila, ugwe kupōndwa u bungw’āle, kinunupo fwānikisya i ndusu yāko, muketile, panongwa yakuti kilipo ikindukimo kisobi. Ugwe upondilwe iking’wale. Muketile, gomokela nu kugelapo kangi. Muketile? Ikyene kikusanusya ukusyumbutuka, ugwe upondilwe iking’wale. Akabalilo kāko ugwe kulonda ukuya Nkristi, kangi ugwe kubuka ukwingila ikipanga, ugwe upondilwe iking’wale. Akabalilo kāko ugwe kulonda ukuya Nkristi, kangi ugwe unyafiligwe mu ngamu ya “Tāta, Mwanundumiana, Mbepo Mwikemo,” ugwe upondilwe iking’wale. Kinunupo ukwīsa ukugomokela. Ugwe utisakuya pa butusulilo mma. Ugwe kwīsakubalanila, bo nalōli bo kīsu. Kilipo i Kindu kimokyene iki kibagile ukukukolela ugwe mu lukindi ulupelelesye, ilyo lyo Lisimbo, i Bangeli, i Lisyu. Kabuno, fyosa-fibili kumwanya na pasi fisakumalikaga, loli i Lisyu lya Kyala litisakumalikamo siku.

<sup>96</sup> Polelo, koleléla i fungilo, lwitiko mu Lisyu! Kangi akayabo kalikosa ka lwitiko ulu ugwe kwitika, kangi komma ukwilamwa na panandi itolo, ugwe ubagile ukwīgūla ikifigo kilikyōsa iki kikwīma pakati pa ugwe nu lusayo ulu Kyala ali nalo kuli ugwe. Kyala alitutulaga uswe ukuya ni fungulilo, lo lwiputo lwangwe. Unko uswe twinamisye imitu gyitu lilino ku lisyu lya lwiputo.

<sup>97</sup> Tāta gwitu Gwakumwanya, uswe tukukupalisya Ugwe ikilo iki ukuti Ugwe utupele uswe i fūngulilo ukwīgūla kwa uswe ubupoki. Une—une ngupalisya Ugwe panongwa ya ikyo, Ntwa, ukuti uswe tupokigwe, kangi panongwa ya fungulilo iyi uswe twābagile ukubombela mpaka na lino. Lōli, Kyala, tupapo uswe u lwītiko, ukuti lililyōsa limo mwa Masyu aga gasimbīgwe mwa Būku Gwāko lyo fyakugōnjela finīni, kangi i Fungulilo iyi yikukolégigwa Yeso. . . Kifigo iki, une ngusanusya, kikukōleligwa Yeso; kangi i fūngulilo, yikukōleligwa lwītiko, yikupalamasya i Lisyu lililyōsa, iyēne yikufūngūla ikyēne. Iyēne yikuguta akagōnjelo akanini kala pāsi kangi uswe tubagile ukwingila mu lusayo lula. Tata Gwakumwanya, tupaga kwa uswe ifungulilo isi uswe tubagile ukuya nu lwitiko mu fingo sya Kyala, ukuti u lwītiko lwītu lulingatoligwāga, ukuti uswe tubagile ukuya bākubagila ukuya bubōmbelo kwa Ugwe na ku bala bābo uswe tukubōmbela palikimo.

<sup>98</sup> Swāga ubutulwanongwa bulibōsa ubwa kisita kwītika, Ntwa, kangi tutula uswe ukuya Bāko. Uswe tukwisa lilino ku

mēsa ya mugonesyo, kangi une ngusuma, Tāta Gwakumwanya, ukuti Ugwe kutuswaga uswe panongwa ya ngilanio syitu syōsa, ukuti uswe tubagile ukwīngila mbusangulufu ubwa bulilanisi ukusyungutila ikigemo kya Kyala. Uswe tukusuma ikylene mu Ngamu ya Yeso. Amen.

<sup>99</sup> Nkundwe gwāngu, kalumbu, linga ugwe uli ni fungulilo ku Kitangalala, ifūngulilo ku Kifigo, ifūngulilo ya bupoki, Kyala akutūle ugwe ukwīgūla ififigo nukundeka Yeso ise nkati. Unko Umwēne ape kwa ugwe i findu ifi ugwe fīyo—fīyo kunyonywa.

<sup>100</sup> Lilino, akabalilo kanandi itolo bo tukāli uswe ukwānda ukubala pa mugonesyo, une ngulonda ukuyoba i kindu panongwa yakuti ikylene kili pa mugonesyo. Kangi akabalilo kako uswe tukwisa ku kigemo iki, yilipo itolo injila yimoyene ukwisa, iyo yo, linga uswe tukukolelela i fungulilo ya lwitiko mmaboko gitu, uyu ikutuleka uswe ukumanya ukuti imbibi syitu sihobokeligwe. Kangi linga uswe tukaya nayo i fungulilo yila ukwīgūla i Kifigo kila, ukuti imbibi syitu sihobokeligwe, uswe tukaya nayo imbombo pa mēsa ya Ntwa. Panongwa yakuti, umwēne uyu ikulya nu kunwa kisitakufikapo, ikulya nu kunwa ikigene ku mwēne, kisisa ukumanyila-ngāni u mbili gwa Ntwa. Lilino, ikyo kyo kyabwanaloli.

<sup>101</sup> Une ngusakisya twēsa ba uswe tumenye ukuti umwīsyūgu lyo Lisiku lya Mugonesyo Gwakikolo. Ili lyo lisiku ili fyōsa i fipānga fikulya u mugonesyo. Ilyēne lyo Lisiku lya Kikolo lya Mugonesyo ukukilania nkīsu iki. Kangi une ndinkwinogona ukuti ikylene kikuyaga kitalusye ukuyoba i lisyu pamo mabili pa mugonesyo bo uswe tukāli ukwega ikylene, akabalilo kōsa u ntīmi, linga umwēne iganile, isakwēgaga a Masimbo gītendekīsyē kuli ukubala kwa u—u lubātiko lwa mēsa ya Ntwa. Lilino, ubulilanisi ubu. . . Lilino, une ndikwegaga mma loli itolo ukufwana amaminiti kalongo.

<sup>102</sup> U mugonesyo ugu uswe twītendekīsyē ukulya, gufumile pakuya kutātikana ukukulumba ukwa kilikōsa ikimanyisyo mu i Bāngèli. Ikyo kyāli kyābo. . . kimo mwa lutatikano lwābo lwākwānda nkipānga ikyākwānda. Kangi umwīsyūgu a baProtestanti, ba Episkopo na baMethodisti, kangi bīngi ba fipānga fya Protestanti, āngàli nulusekelo bikwītikisya i Kikatolika, ikimanyisyo kya Katolika gwa Roma, linga abēne babāgile ukukilania pamwanya pa kūlu akanini ka mugonesyo. Lōli abēne bikwītikisania ukuti u mpūti abagile ukwēga nu kuya ndūmbilili, i kipānga kya Katolika kyālītikisye pa ikyo utubalilo twīngi mu mabūngāno ni ngomano syābo. Abēne bikwītikisya pa ikyēne. Kangi abēne bisakwitikisya pa nyīpūto isyakukindana, na fyosa bo ifyo, ikipanga kya Protestanti bisakwitikisania pa kyēne. Kangi a bakatekisimu na fyosa bo ifyo, ikigemo ikinini apa na apo, kangi ikipanga kya Katolika kikwiganaga ukubomba ikylene. Loli akabalilo kako ikylene kikwisa ku mugonesyo, pala abene balinkugwa.

Aligwesa uyu abalilemo isyambukulu amenye ikyo. Lōli, ena, ku njila yāngu yakwinogonela, abēne babagile ukuya ni kulūndiko ukulekana nafyo, bo une—une mbagile ukwitikisania ni kyene, umwe muketile, nongwa yakuti ikyene kikaya i Bāngéli.

<sup>103</sup> Loli une ngulonda umwe ukuyoba ikindu kimokyene ku kipanga kya Katolika. Ngimba umwe mumenye i kipanga kya Katolika, ku bwandilo, kyāli kipanga kya bapostoli ba kipentekosti? Naloliloli kyāli! Ikyēne kyāli kyākwānda ubwāndilo bwa kipānga. Kangi umwe muketile kuko abene—kuko abene bikufimbilisigwa, abene balinkumilisya ukwega ukusōsyamo i Lisyu nukwingisyamo u liwio.

<sup>104</sup> Kangi linga i kipanga kya kiPentekosti kikufimbilisigwa ukuyako ifyinja ifingi, ikyēne kikuyaga kubutalipo ukufuma ku i Bāngéli ukukīnda i kipānga kya Katolika kiyīlile umwīsyūgu, ukufuma mūmo ikyēne kikubūkila lilino.

<sup>105</sup> Ikyene kyālyēgīle i kipanga kya Katolika ifyinja fingi, bamia ukusōkāpo ukufuma ku Kyene, ifyinja bamia batatu, ukufuma ku kipanga ikyakubwandilo ukubuka ku kipanga kya Katolika gwa Roma, iki abene baalyandile nakyo. Kangi abēne bakolile, ukutwāla nkati abagindikigwa abanywāmu ni findu, kangi abēne bātumwilēko panja *iki* nu kubīka nkati *iki*, kangi ukusōsyāmo panja *iki* kangi ukubīkapo *kila*, kangi bagwīsīsyē ififwāni fyabapanja nu kubīkapo ififwāni fya Kikristi, na fyosa bo ifyo, kangi itolo kupepusyako pa Ikyo mpaka abene bikwisa ku iki abene balinakyo lilino, i kipanga kya Katolika gwa Roma.

<sup>106</sup> Kangi i kipanga kya kiProtestanti kya Pentekosti ukufuma ku—ku fyinja malongo mahano iki ikyene kili mu kuyapo, kangi kūko ikyene kigwīle ukufuma kūko ikyene kyālyāndīle, ikyene kisakuyaga mbubonekelo ububībipo ukukinda i kipanga kya Katolika, mu fyinja mia yumo ukufuma lilino. Uko ko kutalusya. Ilyo lyo lisyu linywāmu ukuyoba, lōli itolo kēta kūko abēne bagwīle ukufumako. Abēne bābūkile mulamula mu kipāngānio, abēne balinkubūka mulamula mu kupepesyako pa *iki* kangi *kila*, na kilikyōsa ikīngi. Kangi pala abēne bikubūka, muketile, ukugomokela kulakula.

<sup>107</sup> Lōli, *mugonesyo*, ikyēne kikubilikigwa “i fyakulya-fya-namayolo fya Ntwa.” Lilino, abandu bingi, abene bikulonda ukwega ikyene ndubunju. Bakāyobile mwi Bangeli ikyene kyāli *kyakulembūkila* Kyake. Kangi mumo abandu aba umwisyugu, mumo abene babagile ukuyoba “ifindu-fya-namayolo fya Ntwa,” kangi abene batikubomba. Abēne batumwileko *fyanamayolo*, nu kōmōla ikyēne, nu kukibilikila ikyēne “fyakulya-fya-pamusi,” butoyofu. Fyakulya-namayolo!

<sup>108</sup> Lilino, akabalilo kōsa ukukanikana ni li Bāngéli, ikyēne kyāli lukānikano akabalilo kala. Abandu balinkusitakupilikisya ifyakulya-fya-namayolo fya Ntwa. Akabalilo kako abene bikwisa ku mēsa, Pauli ābabulile a Bakorinti bala, abene



bīsága nukuya bagāle ku mēsa ya Ntwa. Muketile, ikyene kikāpilikisigwe palapala pala. Umwene alinkuti, “Linga umwe mukulonda ukulya, lyaga ku kaya.”

<sup>109</sup> Kangi ikindu ikingi, ikyene kikapilikisigwe, iki ikyene kyáli. Abatulwanongwa, nu mundu ikwitūgala mu butulwanongwa, bikwīsa kangi balinkulya u mugonesyo. Kangi ikyo kikāpilikisigwe. U nnyāmbāla ikugonana na mama gwāke, unna ugwakummwaga, kangi i kipānga bālimbūlile umwēne isya ikyēne; akāli ukulya u mugonesyo ku mēsa.

<sup>110</sup> Kangi pala pālipo ukutapukana pakati pa bēne, kangi abēne bākāli pōpe bālyāga u mugonesyo. Umwēne alinkuyoba, “Une ngupilikisya ukuti umwe mukwēnda ngati babōsa a Bapānja. Kangi kulipo—kulipo ukukanikana pakati pa umwe, mūmo kulipo ku—ku fiyofiyu mu nyūmba ya Kefasi, na fyōsa bo ifyo.” Alinkuti, “Umwe mukwenda bo mumo a Bapanja bosa.” Muketile, ikyene kikāpilikisigwe.

<sup>111</sup> U mugonesyo go bwīla gukapilikisigwa. Lilino, une nabagiile ukubuka pa ikyo ku sala nyīngi, loli uswe tukufimbilisigwa ukweega umugonesyo nu kusukana injayo. Lilino abēne itolo bōmwile ukusukana-injayo palikimo, lōli itolo fināndi fya fipānga-fipāgūke. Bingi ba kiPentekosti bīsile nubumalikisyo ukusōkako ukufuma ku kyene. Muketile? Kangi ikyene kikāli mu li Bangeli itolo mu njila ikyene kyāsīmbīgwe. Muketile?

<sup>112</sup> Lilino, Roma atikukōlēla ikyene “mugonesyo.” Abene bikukikolēla ikyene “mīsa, ikyene kyo mīsa mwikemo.” Abene batikulya umugonesyo, abene bikulya i mīsa. Ikyene kyo mīsa, kangi i mīsa naloliloli kikusōsyako ubusanusi bwanaloli ku mugonesyo. I *mīsa* kikusanusya “kusūbila.” Abene bikwega i mīsa, ukusūbila (ukuti mu kubomba iki mu mīsa) ukuti Kyala isakubaswaga abene isya mbībi syābo, ukwisila mu kulya “umbili gwanaloliloli gwa Kristi, ugu umputi ikusanusya ku Mbili ni Lilopa lya Kristi,” ukulya kila, ukusūbila ukuti Kyala isakōmola imbībi syābo ukwisila mu kubōmba lula. Ikyēne kyo mīsa.

<sup>113</sup> Aba Protestanti bikukikolela ikyene “mugonesyo.” Mugonesyo ikusanusya “ukupalisya.” Ukuti aba Protestanti. . . Aba Katolika bikwēga i mīsa, mu kusūbila ukuti Kyala abaswege abēne isya bubōmbela-bubibi bwābo. Aba Protestanti bikulya ikyēne nu kupālisya kuli iki kitalile kibōmbīgwe nu mugonesyo na Kyala; kwāngala nu Mwene, ukuti ikyene kitalile kibombīgwe. Aba Katolika bikusūbila ikyene kibombīgwe; aba Protestanti bikuyoba ikyene kitalile kibombīgwe. Aba Katolika bikuswiga linga imbibi syake sihobokeligwe; u mProtestanti ikwiyoabela ukuti isyēne sihobokeligwe, ukuti umwēne yo mwābūke. Kangi u mugonesyo ko kwāngala na Kyala. Kangi ifindu ifi uswe tukwega, komma mu *subilo* ukuti

imbibi syitu sihobokeligwe, loli isyene *sili* sihobokeligwe. Panongwa yakuti ulwene. . .Ulwene lo lusubilo; kangu ulungi lo lwitiko. Yumo ikusubila umwene yo ntalusye; kangu uyungi yula amenye umwene yo ntalusye. Muketile? Uyungi yula, yumo ikusubila, panongwa yakuti umwene akamanya kuko umwene ikwima; uyungi yula amenye ukuti umwene ntalusyi, panongwa yakuti umwene amenye iki Kyala ayobile. Ikyo kyo kyene. Uko ko kukindana. Polelo, akabalilo kako ugwe kusubila itolo, mwandeg; loli akabalilo kako ugwe umenye, polelo kindililaga. Muketile, polelo ugwe uli mugonesyo na Kyala. Protestanti fyo, umwene ikuyoba umwene ahobokeligwe kangu umwene amenye ikyene; aba Katolika bali ni mīsa, ikusubila isi umwene isakuhobokeligwaga. Ikyene kyo itolo bo iki: yumoywene yo nsumasuma, ikusubila ukuti kilikyosa kili kanunu, muketile; u yūngi yula yo nsumasuma ikupālisya kuli iki kyo kitalile kibōmbigwe. Abēne bosa-babili basūmi. Lōli yumo ikusūma, ikusūbila umwēne isakukaba ikyēne; unsumasuma uyūngi amenye umwene ali nakyo ikyene, nukumpalisya Umwene panongwa ya kupa ikyene kwa umwene. Lilino, kulipo ukukindana. Ugo go mugonesyo. Ena, nkulumba. Yumo ikusūbila ukuti umwene ahobokeligwe; u yūngi yula amēnye umwēne ahobokeligwe, kangu ikupa imbālisyo kuli ikyēne.

<sup>114</sup> Popāpo, ubulilanisi buli kwa Bakristi aba bapāpigwe kangu mwa Mbepo gwa Kyala. Kangu *kupāpigwa-kabubili* kitikusanusya itolo lilino ukuti ugwe ulinagwe u Mbepo Mwikemo. Lilino, kumbukikilaga. Lilino, bīngi bikumanyisya ikyo. “Une ngamanya yumo uyu ikumanyisya ikyene bo ulu,” bo ugwaiyolo u Nkundwe Arganbright āyobile ikyo ikilo kila ukufuma pa kigemo apa, muketile. Lōli, ubupāpigwe ubupya bukaya lōsyo lwa Mbepo Mwikemo. I Lisimbo litikutula ikyene, une ndikwinogona, muketile, ku njila yangu iyakukētēla ikyene. Muketile? Une ngwitika ukuti ugwe upāpigwe kabubili. . .

<sup>115</sup> Kangu iyo yo nongwa une nalōli ngubōmbēla u lōsyo lwa Ngamu ya Yeso Kristi, lōli komma ukwimesya-kangu. Lilino, i kipanga kya Pentekosti, kipanga kya Pentekosto ugwa United, bikōsya mu Ngamu ya Yeso Kristi kuli ubwimesye-kāngi. Une ndikwitika ikyo mma. Kangu abene babāgile ukubomba ikyene linga abene bikulonda. Loli une ngwitika ukuti Peteri āyobīle, “Pinduka,” ikyākwānda. Amisi gatikusyumula imbibi. I Kipanga kya Kristi kikulumbilila ikyene mu njila iyo. Loli une ngwitika ukuti ulupinduko, busulumanie bwa bunyakyala; *pinduka* kikusanusya “syumbutuka, gomokela,” ugwe upondilwe iking’wale, “anda lōsa kāngi.” Bōmba ikyo tāsi! Kangu u lōsyo mmisi lo itolo buyobelo bwa panja ubwa kindukimo iki kibōmbigwe nkati mwa ugwe, ukuti ugwe gwikisye Kristi ukuya Mpoki gwako.

<sup>116</sup> Une ngusakikisya ikyene kyo itolo kipanga apa ikilo iki,

mūmo une mmanyīle, Une ngaya apa gwakufwana ukumanya uyu ikwisa pamo mma. Une ndinako ukuyobeligwa-ubusobi ukunini apa pakaya patali mma pa kōsya u nnyambala apa nkitubwi, u mwinitu unkangale. Kangi une ndinkubūka ku mwēne, umwēne āli nnyāmbāla unnunu unkāngāle. Une nāli nu lusako ukulongolela i kikolo kyake kyosa kwa Kristi, bosa ba abene Bakristi. Unnyambala unkangale uyu ali nnyambala unnunu, kangi une nālinganile umwene, polelo une ndinkubuka nagwe kangi une ndinkuyoba ku mwene, “Papa, nongwa ya fiki ugwe utikuya Nkristi?” Umwene anganīle une.

117 Umwene alinkuti, “Nkundwe Branham, une mbagīle ukuya Nkristi akabalilo kāko une mbagīle ukufika ukuya nnunu ukufwana.”

118 Une ndinkuti, “Ngukubūla ugwe iki ugwe kubombaga, Papa. Ugwe kelengania mpaka ugwe kwāga kūko ugwe ubagīle ukuya kanunu ukufwāna, polelo mbula une kūko ubuyo bula buli, une ngulōnda ukubūkako, nīne.” Une ndinkuti, “Kristi akālīsīlēmō siku ukumpoka u nnyambala unnunu. Umwene alinkwisa ukupoka unnyambala umbibi.” Akabalilo kako ugwe kwinogona ukuti ugwe uli nnunu, polelo Umwene akālīsīle ukukupoka ugwe. Umwene ālisīle ukubapoka abene aba Umwene ameyene babībi. Muketile? Kristi āfwīle ukupoka abatulwanongwa. Muketile? Kangi une ndinkuti, “Papa, lulipo ulukindi papapa apa.”

Umwene alinkuti, “Ena, une ngukwesa ingambo isi.”

Une ndinkuti, “Une ndikuyaga nukuyoba isya isyēne.”

Umwene alinkuti, “Une ngelīle ukusileka isyene lōsa, Nkundwe Branham.”

Une ndinkuti, “Umma ndaga, uswe tutikuyaga pakuyoba isya sogoto sya ngambo.”

Umwene alinkuti, “Ena, akabalilo kako une mbagile . . .”

119 Une ndinkuti, “Komma—komma ukuyoba kangi mma isya isyēne, unko isyēne sibūke. Une ngulōnda ukulālusya ugwe ililālusyo.”

Umwene alinkuti, “Umma ndaga, ngimba ikyene kyo fiki?”

Une ndinkuti, “Ngimba ugwe kwitika ukuti aliko Kyala?”

120 Alinkuti, “Naloliloli, une ngwitika ikyene.” Alinkuti, “Une ngwitika ikyo ukuya namaka bo ugwe kubomba, une ngusakikisya, Nkundwe Branham.”

121 Une ndinkuti, “Ngimba ugwe kwitika ukuti Kyala yulayula ālobwike uluko Lwāke kangi ātēndekīgwe ukuya mbili nukwitugasya pakati pa uswe mu mūndu gwa Yeso Kristi, ukuti apokege u mūndu?”

Umwene alinkuti, “Ena, une ngwitika ikyo.”

“Kangi Umwene āfwile ukupoka abonangi bo ugwe guli kangi ngati une?” Muketile?

“Ena, une ngwitika ikyo.”

<sup>122</sup> Une ndinkuti, “Lilino, ikylene kyo itolo bo iki. Uswe twesa tuli mu kiyumba iki ikinywamu pabwa apa, kangi uswe tuli mminyololo, kangi une ngabagila ukwīma ukukilania mu nguto iyi nukuyoba ‘iki kisakundūla une ukusōkamo mminyololo,’ Une ngwima pa nguto yila nukuyoba ‘kila kisakundūla une ukusōkamo mu mminyololo,’ uswe twesa tuli mu mbutolwe bulabula. Kangi aligwēsa u mūndu uyu āpāpīgwe nkisu iki āpāpīgwe mu butulwanongwa, ābūmbīgwe mu busāmbūke, ukwīsa ku kīsu ikuyoba ubutūngulu. Umwene yo lisambuke, ukwanda itolo.”

<sup>123</sup> Yumo ālalusīsyē ilisiku limo, umwēne alinkuti, “Nkundwe Branham, linga...kubagile ukuyapo ukukindana pakati pa Adam na Eva, na bāna bābo umwīsyūgu, linga abēne bāli bōsa ngelebune, bikwēnda mu i...Āngāli—āngāli imibili gyābo gikuya gifwēne?”

<sup>124</sup> Une ndinkuti, “Umma, nkulumba.” Uswe twābukaga ku kāya ukufuma ku bufwimi bwa balukoti, Nkundwe Fred na une, kangi ikipambo kya bēne. Une ndinkuti, “Umma, igylene āngāli gikuya lulalula mma.”

<sup>125</sup> Alinkuti, “Ugwe kusanusya Eva akabagīle ukuya nkīkūlu bo abāna balindwana bāke, kangi Adam akābagīle ukuya nnyāmbāla bo banabalumiana bāke?”

Une ndinkuti, “Mu luyīndīko lwingi, lōli komma mu luyīndīko lōsa ulwamumbili.”

Umwēne alinkuti, “Fyo fiki fikuyaga bukīndāne?”

<sup>126</sup> Une ndinkuti, “Abēne āngāli batikuya nakyo ikimbwēla kilikyōsa. Abēne bāpeligwe. Kotalusya. Abēne bakālūngisīgwe ku nakimo.”

<sup>127</sup> Pene pāpo ikyo kikipāpa pala pa kilikyōsa ikyo kyo kipāpīgwe nkīsu iki, kīkunāngīsyā ikyēne kyo kisāmbuke, ukwānda itolo. Uko ko kotalusya. Une ndinkuti, “Naloliloli, bulipo ubukīndane. Abēne angali bakaya nakyo ikimbwēla. Abēne bakālūnganisīgwe ku bukīkūlu bulibōsa, ukwīsa apa.” Muketile, Kyala ābapelile abēne.

<sup>128</sup> Lilino, une ndinkuti, “Une ngulonda ukuyoba ikīndukimo. Unnyambala aligwesa mu nyumba ya baminyololo iyi, ngimba ywāni yo mwikemo? Yo ywāni uyu akāpāpīgwe nu kugonana? Yo ywāni abagīle ukuntūla uyungi, kali umwēne yo fiki? Uswe twesa tuli mu nyumba ya baminyololo iyi. Lōli Kyala āpelile Mwēne kimo mwa fipeligwa Fyāke nu kwīsa ukukilania ukugonana, ukwīsila i Lilopa ilīkēmo ili Umwēne āpelile Mwēne, kangī ukwīsila mu Lilopa lila Umwene ātutabwile uswe.” Une ndinkuti, “Ugwe kwitika ikyo, Papa?”

Umwene alinkuti, “Une ngwitika ikyo.”

<sup>129</sup> Une ndinkuti, “Kristi áfwile ku munda umbībi bo ugwe. Lilino, yilipo i njila yimoyene itolo ukubomba. Kikayapo nakimo iki ugwe ubagīle ukubomba. Umwēne ikupa ikyēne kwa ugwe. Ugwe ukabagile ukwībagīsyā ikyēne. Nakimo ugwe ubagile ukubōmba ukukyāga ikyēne. Umwēne itolo ikupa ikyēne kwa ugwe. Ngimba ugwe kwisakwitikisyā iki Umwene ābombile kwa umwe, ukukukyunga ugwe ukufuma ku gehena?”

<sup>130</sup> Umwene alinkuti, “Une ngubombaga ikyo.” Umwene alinkuti, “Loli linga une mbagile itolo ukumasya isogoto sya ngambo isi.”

<sup>131</sup> Une ndinkuti, “I sogoto sya ngambo sisikwipākisyā pa syēne. Ugwe itolo . . . Une ndikukulālusyā ugwe. Une ngaya gwandagilo mma. Une ngwitika mu lipyāna. ‘Kangi bōsa aba Tāta ambele Une bisakwisaga kwa Une.’” Une ndinkuti, “Linga ugwe kwitika ikyo ni ndumbula yako yosa!”

Umwene alinkuti, “Ni ndumbula yangu yosa, une ngwitika ikyene.”

<sup>132</sup> “Polelo ngimba ugwe kwisa kwitikisyā ikyene pa lwalo lula, ukuti ugwe ukaya gwakubagilila ikyene, loli Umwene yo Yuyo uyu abagilile? Komma ukuketa pa gwimwene; keta ku Mwene, panongwa yakuti ugwe ukabagila ukubomba nakimo kwa gwimwene. Nkēta Yula yūyo ābōmbile ikindukimo kuli ugwe. Bule isyā Umwēne?”

“O,” umwene alinkuti, “Umwene yo abagilile.”

Une ndinkuti, “Ikyo kyo kyene, polelo itikisyā iki Umwene ikukupā ugwe.”

Umwene alinkuti, “Une ngwitika.”

<sup>133</sup> Kangi une ndinkumōsyā umwene mu Ngamu ya Yeso Kristi. Kangi umwene asōkaga panja pa apa nukukosyā ingambo.

<sup>134</sup> Imilungu minandi igi gikīndīle une nāli pāsi ku buyo bwāke. Une ndinkukēta imboniboni ikilo kimo, iya mpiki gwambindimbindi kilasiku gukutumuligwa pāsi, gukusyumbutusigwa pamwanya ukuya pāsi. Une ndinkukēta ikitapwa kikomeleligwe pa gwēne. Palapala kifuki ku kitapwa ikyabumalikisyō kyālipo ikitapwa ikyakubonekela. Kangi pāsi pa kitapwa kila, palapala pāsi pa bumalikisyō, ukubopa panja bo *ulu*, umpiki gwakonywike palapala pala. Kangi i Lisyu lilinkuyoba, “Ikyene kyābagile ukuya ugwe,” pamo, “Ikyene āngali kili ugwe.” Kangi Papa Cox alinkugwa, ukukonyola inyuma yāke nkati *muno*. Kangi polelo ulubūnju lwa kilabo abēne balinkutwāla i sogoto syāke ku mwēne akabalilo kāko umwēne āli nkitala, ikinyonywo kyabōmbile kyālindekile umwēne. Imilungu igi gikīndīle! Umwēne akagonjīlemo siku yimo, komma nukulōnda yimo pamo nakimo ikīngi. Muketile? Kangi une nālimbwene umwene akabalilo aka kakindilepo,

akabalilo kako amaboko gake gali itolo ga bulauni gosa, imilungu minandi igi gikindilepo, ni sogoto, kang'i lilino umwēne akabagila nu kwikasya kuli yimo ukuya mbusyūngutila umwēne. Bīka ifindu ifyākwānda tāsi! Komma ukugela ukuya nnu; ugwe uli mbibi, ukwanda itolo, kang'i nakimo ugwe ubagīle ukubomba. Lulipo ulukindi ulwa kukindanisa, kang'i abandu bosa bali pa lubafu lula.

<sup>135</sup> Lilino, akabalilo kāko une nāpāpīgwe nkīsu iki, ikyēne kyāli pakati pa bwēgi ubwikemo, pakati pa tāta nu māma gwāngu; nkati mūnda mwāke mwāli ilifūmbi, nkati mu mfuko gwa tāta gwāngu mwāli imbakasya ya lilopa. U būmi bwāngu bwīswile ni mbakasya ya lilopa yila (komma ni lifūmbi lya māma gwāngu), ni mbakasya ya lilopa ya tāta gwāngu. Kang'i akabalilo kako akambakasya ka lilopa kala kalinkwingila mbuyo bwake ukwakwagana ni lifumbi, akabalilo kāko ikyēne kyābōmbile, ikipeligwa kyalāgīligwe kwa Kyala ukumba une umbili. Kang'i polelo ukuti une nāpāpīgwe mu luko lwa būndu, one nāpēgīgwe u lusako uku—uku ukuya mūndu gwamīnogono mūmo ubūndu bwa bāndu buyīlilo, kūko une nābagīle ukwēndēsya i ligali, pamo une mbagīle ukubomba ifindu bo bandu bikubōmbēla, ukwēnda, ukuyoba, ukwēndēsya i ligali, na fyōsa bo ifyo. Une napegigwe ikyo, panongwa yakuti une mbapigwe mu kikolo kya bandu, kang'i mbīgwe a maka ga mahala ukuya būndu bwa mūndu.

<sup>136</sup> Lilino, akabalilo kāko une nāpāpīgwe mu nyumba ya Kyala, une nālisīle ukwisila mu Lilopa, i Lilopa likumbapo une u Būmi. Kang'i polelo ukufuma pāpo une ndi mūmi mwa Kristi, Umwene ālinyōsisye une na Mbepo Mwikemo na maka, ukuya mwanundumiana gwa Kyala. Lilino, itolo bo une mbagīle ukwēnda, ukuyoba bo yu mūndu, ukwēndēsya iligali lyāngu bo mūndu, lilino akabalilo kako une ngwambilila u Mbepo Mwikemo, une ngwambilila a maka ukubopesya imisetano, ukuyoba mu ndimi imbya, ukulumbilila Inongwainunu, ukubumbulunya ababine. Une nōsīgwe! Komma ukupāpīgwa; lōli nōsīgwe!

Abēne bābūngēne nkyūmba kyapamwanya,  
Bosa biputa mu Ngamu Yake,  
Abene bālyōsigwe na Mbepo Mwikemo,  
Kang'i amaka ga bubōmbēlo galinkwīsa.

<sup>137</sup> Ameni. Umwe mukwitika ku Bumi Bwabwilanabwila, kang'i mupāpīgwe kang'i nu lwitiko lwinu. Yeso aatile, mwa Mwikemo Yohani 5:24, "Umwene uyu ikupilika a Masyu Gangu kang'i nukummwitika Umwēne yūyo ālindumīle Une, ali nu bumi bwabwila," komma u Mbepo Mwikemo, itolo ali nu būmi ubusitakumalika. Umwēne apāpīgwe mu nyumba ya Kyala. Kang'i polelo mosigwe mwa Mbepo Mwikemo, na maka ga mahala ga lwitiko, ukwītika i Nongwainunu kang'i ukubīka Ikyēne ku mbombo nu kutēdeka Ikyēne ukubōmba kanunu.

Ameni. Polelo umwene ikubombela bo mwanundumiana gwa Kyala. Polelo umwene abagile ukukaga imisyétáno. Yeso aatile, “Ifimanyilo ifi fisakukongaga abene!” Muketile? “Mu Ngamu Yangu abene bisakusatsiyaga imisyetano, bisakuyobaga ni ndimi imbya, ukupimba imiyoka, ukunwa ifindu ifyakugoga.” Muketile, umwene ikwambilila a maka nu Mbepo Mwikemo, ukubomba ifindu ifi.

<sup>138</sup> Lilino, akabalilo kâko Umwêne âbûsôkilêpo, Umwêne alinkuti, “Ikyêne kyo kyakulôndigwa kwa Une ukuti une ngusôkápo. Kabuno, linga une ndikusôkápo, u Mbepo Mwikemo atisakwîsa.” Muketile? Polelo akabalilo kâko Umwêne ikwîsa, Umwêne isakukemela ikîsu kya butulwanongwa, nukumanyisa ubugolofu, nukubanângîsya umwe ifindu ifi fikwîsa (isyo syo imboniboni). “Umwêne isakwêgága ifîndu ifi une mfimanyisye kwa umwe, nukufisetula ifyêne kwa umwe.” A Masyu galagala aga Umwene isile. . . Nayumo umundu abagile ukupilikisya i Lisyu panja pa losyo lwa Mbepo Mwikemo. Kangi akabalilo kako umûndu ikuyoba umwene ali nu losyo lwa Mbepo Mwikemo, kangi ikulwâna ni Lisyu ukuya litalusye, kilipô ikindukimo kisobi.

<sup>139</sup> Pauli âli ndondesya-ubusobi bwa Lwîtikáno Ulupya. Ubwêne bukâli, u Lwîtikáno Ulupya lukasîmbîgwe mma. Pauli âli ndondesya-ubusobi bwa Kikristi, Sauli. Kangi akabalilo kâko umwêne âlyâmbilile u Mbepo Mwikemo, umwêne alinkubûka ifyînja fitatu ukusuluka mu Asia nu kufûnda a Masimbo, panongwa yakuti umwêne âmanyisigwe pâsi pa Gamalieli, ummanyisi unkulumba. Polelo akabalilo kâko umwêne âgomokîle, kangi ifyînja kalongo na mana ukufuma pala, umwêne âbûkîle kula ukwâkwâgâna na Peteri ku Yerusalemu, kangi alinkusyagania ukuti abene baali Lisyu kangi ukwisila mu Lisyu i Nongwainunu yimoyene. U Kyala yulayula uyu âli na Peteri ikulumbilila pa lisiku lya Pentekosti nukubabûla abêne ukupîndúka nu kôsîgwa mu Ngamu ya Yeso Kristi, yulayula u Mbepo Mwikemo âsetwile icyene kwa Pauli, kangi umwene ababulile abene mu Imbombo 19 ukufuma papo abene bábombile balyôsîgwe akabalilo kamo na Yohani, alinkuti, “Umwe mukufimbilisigwa ukosigwa ukwandisya kangi, mu Ngamu ya Yeso Kristi.” Muketile?

<sup>140</sup> Muketile, u Mbepo Mwikemo ikusyâla palapala ukutalula na Masimbo. Lwâke u lwîtiko mu Ikyo lukufûngûla isyâmbutîtu silisyôsa. Ameni. Ili Bângéli lyâyobile, mwa Yohani Gakwanda 5:7, “Filipo fitatu ifi fikubika ubukêti, Kumwanya: u Tâta, i Lisyu (ili lyâli Kristi), kangi u Mbepo Mwikemo. Ifi fitatu fyo Kimo.” “Kangi filipo fitatu ifi fikubika ubukêti nkîsu: amisi, Lilopa, Mbepo. Ifi fitatu fikaya yumo, loli ifyêne fikwitikisania mwa yumo.” Lilino, ugwe ukabagila ukuya na Tata kisita kuya nu Mwanundumiana, ugwe ukabagila ukuya nu Mwanundumiana kisita kuya nu Mbepo Mwikemo; Abêne

bo Yumo. Lōli ugwe ubagile ukuya mwitikisigwe kisita kuya nkemesigwe, kangi ugwe ubagile ukukemesigwa kisita kuya na Mbepo Mwikemo. Ukukemesigwa ko kwisila mu Lilopa, ukwisila mu Lilopa bukwise u Bumi. Muketile? Kangi u Mbepo Mwikemo yo maka ga Kyala, muketile, a maka gapëgigwe ku kipanga.

<sup>141</sup> “Umwe mwisa kwambililaga” (fiki?) “maka,” Imbombo 1:8, “ukufuma iki u Mbepo Mwikemo isile pa umwe. Umwe mwisakwambililaga a maka!” (Komma “ugwe kwisakupapigwa kangi.”) “Umwe mwisakwambililaga a maka ukufuma papo u Mbepo Mwikemo isile pa umwe. Polelo umwe mwe baketi Bangu mu Yerusalemu, Yudai, na Samaria, ku fiyabo fya kubutali fiyo ifya kisu.” Muketile? Ugwe kwambilila a maka ukufuma papo ugwe kwambilila u Mbepo Mwikemo. Loli ikyakwanda ugwe kufimbilisigwa ukwambilila Mbepo Mwikemo, kangi ago go maka ga Kyala, muketile, ukubonesya nu kubonekesya. Ugwe gwe—ugwe gwe...mumo ugwe gwaali mundu, kangi ummanyile ukuyoba nu kwenda nukubomba ifindu ifi umundu ikubomba; akabalilo kako ugwe gosigwe nu Mbepo Mwikemo, ugwe uepigwe amaka ukubombela ukuya banabalumiana na banabalindwana ba Kyala. Fyobene abandu bikubombela kangi ukubomba injila iyi abene bikubomba umwisyugu, abene bakayamo siku bisusigwe na Mbepo Mwikemo. Linga abene babagile, abene angali bikubombela nubukindane. Abene bikwiyobela ukuti abene bali nakyo, loli Yeso alinkuti, “Ni seke syabo ugwe gwisakubamanya abene.” Polelo ugwe ubagile ukubomba bulebule ikylene, umwe muketile, ikylene kyo itolo kikusofania. Muketile? Loli gomokela ku fyabwanaloli!

<sup>142</sup> Lilino, linga ugwe kwenda nubutalusye kangi kwiyobela gwimwene ukuya Nkristi, uswe tukukolela ugwe ikilo iki ku mesa ya Ntwa. Umwisyugu, kisita kwilamwa, umugonesyo gukuligwa ukukilania ikisu, bamo mwa bene mu njila yimo na bamo mu yingi. Loli une ngwinogona injila innunu-fiyo ukubomba ikylene ko kukongesya a Masimbo, itolo i njila abene babombile ikylene mu Masimbo. Une ngwinogona ikyo kikuyaga kyakwikutisya.

<sup>143</sup> Ngimba ugwe uli nalyo i Bangeli Iyako, Nkundwe Neville? Nkundwe Neville lilino isakubala a Masimbo.

[Nkundwe Neville ikuyoba, “Mu ntu gwa 11 gwa Bakorinti Bakwanda, ukwanda pa linandi Iya 23:”—Nsimbi]

*[Kabuno une nambilile ukufuma kwa Ntwa ikyo kikyone nene Une natwēle kwa umwe, Ukuti u Ntwa Yeso ikilo kilakila mu iki umwene apēfyigwe alinkwēga u nkati.]*

*[Kangi akabalilo kako umwene apēle ulupi, umwene alinkumenyana ugwene, kangi alinkuti, Ega, ilya; ugu go mbili gwangu, ugu gubongotoligwa kuli umwe: iki bomba mu bukumbusyo bwa une.]*



[*Ukufuma mu kayilo kalakala kangi umwēne alinkwēga ikikopo, akabalilo kāko umwēne ālile, ikuyoba, I kikopo iki kyo lwītikāno ulupya mu lilopa lyāngu: iki bōmba umwe, kingikingi mumo umwe mukunwa ikylene, mbu bukumbukilo bwa une.*]

[*Namanga ka kīngi kāko umwe mukulya unkati ugu, nukunwa ikikopo iki, umwe mukunāngisya u bufwe bwa Ntwa mpaka umwēne ikwisa.*]

[*Panongwa iyi aligwesa uyu ikulyāga u nkati ugu, nukunwa ikikopo iki ikya Ntwa, kisitakubagililigwa, isakutobesigwe nongwa ya mbili ni lilopa lya Ntwa.*]

[*Lōli unko u mūndu ikētēsye mwēne, kangi mūla unko umwēne alye ifya nkati gula, kangi amwe ifya kikopo kila.*]

[*Namanga umwēne uyu ikulya nu kunwa kisitakubagiligwa, ikulya kangi ikunwa ikigune ku mwēne, kisita kukētela-ngāni u mbili gwa Ntwa.*]

[*Panongwa ya iki bīngi bo bōnywa kangi babinebine pakati pa umwe, kangi bīngi bikugon’utulo.*]

[*Kabuno linga uswe tubagile ukwilonga twibene, uswe tukabagila ukulongigwa.*]

[*Lōli akabalilo kāko uswe tulōngigwe, uswe tukufūndigwa nu Ntwa, ukuti uswe tulingatobesigwàga ni kisu.*]

[“Untwa sayaga ukubala kwa Lisyu Lyake.”]

<sup>144</sup> Ikyēne kyo bwīla kīndu kīkēmo fiyo, i kīndu ikisisya fiyo, une ngwīnogōna uswe tubagile ukwīnamisya imitu gyītu lilino mu lwīpūto lwakimyemye. Umwe nyīputila une, une nisakubīpūtila umwe. Unko uswe twīpūtile yumo ku nnine, ukuti Kyala isakuyaga gwakisa kwa uswe ifipeligwa ifisitakubagilila twe tuli kifiku ukulilana ifya iyi isakaramenti ingulumba mu bukūmbūsyo bwa bufwe bwa Ntwa gwītu.

<sup>145</sup> [Nkundwe Branham ikwima-tasi pa lwīpūto. Ubuyo busitakandu pa tepi—Nsimbi] Ulwīpūto ulu ulwa kulāta uswe tukupa kwa Ūgwe, Tāta gwītu, pa kigemo Kyāko ikyagolidi, ni Likemo lyītu, u Ntwa Yeso. Uswe tukusuma ikylene mu Ngamu Yake. Amen.

<sup>146</sup> Lilino une ngwitika abakulumba bisakwegaga ubuyo bwabo, kangi abene bisa...ikya kipanga, kangi abēne bisakutwāla abāndu pala bo abēne bikwīsa, unkolofwa ukufuma pa nkolofwa, kuli u mugonesyo. Bwīla inogōna isya nyīmbo yila:

Gwempala Kang’osi uyu ikufwa, Ililopa Lyako  
ilipala  
Litisakutāgamo siku a maka gake,

Mpaka kyosa i Kipanga ikitabuligwe ikya  
Kyala  
Kikupokigwa, ku kutulwanongwa kang'i mma.

Unko uswe twinamisye imitu gyitu.

<sup>147</sup> Gwaipyana kang'i Tata Mwikemo, Yehova, unkulumba Gwamakagosa, tumaga isayo Syako pa bandu Bako bo uswe tukugulila. Swaga imbibi syitu. Kang'i lilino uswe tukupa kwa Ugwe i sakaramenti iyi, u bwālwa bwa mafilu ubu, amāfilu aga gabyāligwe, kang'i amaboko ga babōmbi galinkugakanyakanya agēne palikimo. Kang'i ikyēne kyātēdekigwe mu bwālwa kuli i nongwa iyi uswe lilino tukutwālila ikyēne kwa Ugwe, ukuti ikyēne kibagile ukwīmilila kwa uswe i Lilopa lya Ntwa Yeso Kristi. Une ngukusuma Ugwe, Tata, ukukemesya u bwalwa pa nongwa yila. Swaga silisyosa isya mbibi sya uswe. Kang'i umundu aligwesa uyu ikwambilila u bwalwa ubu ku mbili gwābo, baliyaga nabo ubukafu, amaka, nu bupoki ukufuma kwa Ugwe. Tupaga ikyene, Ntwa. Uswe tukusuma ikyene mu Ngamu ya Yeso. Amen.


<sup>148</sup> I Bāngeli lyāyobile ukuti akabalilo kāko Umwēne āmenyēnie u nkati nu kugusaya ugwēne, alinkuti, “Ega nu kulya, ugu go Mbili Gwangu ugu gubongotwike kuli umwe. Iki bōmba ku bukumbukilo bwa Une.” Kang'i akabalilo kāko uswe tukwēga utusaka utunini utu utwa nkati, utwa kōshala, utu to tutēdekigwe kisita-nkese, ikyēne kitēdekigwe na Bakristi ikyene kitēdekigwe panongwa yakuti ikyene—ikyene kikwimila u Mbili gwa Kristi. Uswe tukupilikisya ukuti—ukuti ikyēne kyāli bafūndigwa ba lisiku lya Kristi, pamo ilisiku lya kipanga, aba bālyēgile utuyabo utu nu kupela ikyakulya-kya-kunamayolo kitēdekesigwe ku kyakulya-kya-kunamayolo ikyābumalikisyo, ku kyākulya-kya-bumalikisyo kya Kristi. Kang'i ukusuluka ukukīndāmo i Bāngeli, ikyēne kyāli bafūndigwa aba bābōmbēlāga ifindu ifi ku bāndu. Kang'i umwisyugu, abafundigwa bitu ba masiku-gamwisyugu, abakundwe bitu apa aba kipanga, abafundigwa aba Nongwa iyi, bikubōmbēla ku bandu. Kang'i abene bikwegaga utuyabo utu nu kutupapo utwene ku bandu.

<sup>149</sup> Kang'i lilino akabalilo kāko umwe mukwāmbilila unkati ugu, kumbukilāga, ugwēne gukwīmilila Kang'osi. Ifyinja ifitali ifi-fikīndile akabalilo kāko u kang'osi gwa Israeli ālyōkigwe pamwanya pa mōto, kang'i ālyēligwe na māni amakali, abāndu bāli na maka; ifilato fyābo fikamalikēmo siku, imyēnda gyābo gikalimo siku ukuya ngelebune-milisi, mu njila yosa mpaka abene batikaga i kisu ikifingigwe. Kyala alitukyungaga uswe bakafu, basangaluke, tumbombelege Umwene mpaka uswe tukufikila i Kisu Kifingigwe iki Umwene atupele uswe.

Unko uswe twipute.

<sup>150</sup> Gwaipyana Tāta Gwakumwanya, bo une nguyoba ikilo iki ikya Mwikemo, u Mbili gula unkemesigwe ugwa Ntwa gwitu, mwa Yūyo bwālitūgēsye ubwisusye bwa Bwakyala, akabalilo kako une ngwinogona isya Mbili gula ukuya gwākinyīgwe nu—nu kubongotoligwa, kangi i Lilopa likusōka panja, inyuma Yāke ni mbambo Syāke sikumulika ukukindamo, imikyapi mmwanya na pāsi pa nyuma Yāke, akabalilo kāko une ngwīnogōna isya ugu unkinyīgwe, unkati untikigwe gukwīmilila kila, ikyēne kikwisa kipupwano mu ndūmbūla syītu, uswe tukulambalīka indumbula syītu, Ntwa, pa kigemo Kyāko ikilo iki. Tuswaga uswe, O Kyala. Kangi unkati umbongotoligwe ugu guli, bo ugwēne gukubūka nkanwa gwa aba, Bāko ababōmbi, kangi abēne bali kyāganiāga ukuti ikyēne kyāli Gwāko u Mbili umpala ugu gwākuyubulīgwe nu kufulasīgwa, kangi ni fulale uswe tubumbulusīgwe. Tupaga ikyene, Ntwa. Sukaga u nkati gwa kōshala ugu ku kulōndigwa kwāke. Uswe tukusuma mu Ngamu ya Yeso. Ameni.

Itolo i miniti.

<sup>151</sup> Ugwene gukaya mugonesyo umwīgalilīgwe mma. U mwitiki gwa Kikristi aligwesa ikwambililīgwa ku kigemo kya Ntwa, ukuya nu bulilanisi ubu na uswe...?... 

62-1007 I Fungulilo Ku Kifigo  
Kitembe Kya Branham  
Jeffersonville, Indiana U.S.A.

KYANGONDE

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Ukusanania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)